


KINSA BA SI JESUS?

 Kung ako lang, kining nagkaaduna kita, kaganina, og naandan na nga piyesta sa pagpakaon, kining maanindot nga pamahaw nga gisalohan nato; kasagaran man gud usa ra ka buok nga tinapay nga dili na init ug dunay gamay'ng jelly lang nga gipalibot niini. Didto ako sa Phoenix, sa miaging adlaw, ug gihatagan nila ako og pancake nga wala'y...ang tawag namo niini, didto sa Habagatan, “flapjacks,” ug wala kadto'y arnibal nga lakip man unta, ug busa ako—ako—nagbutang na lang ko og asukal sa akô. Kadto medyo lang... Ug karon, dinhi, nagkaaduna kita og maayong pamahaw! Ug dili lamang kana, sa natural, magkaaduna pud kita og kumbira sa espiritual.

² Nalipay gyud ko og ayo nga madungog ang testimonyo sa usa ka igsoong lalaki dinhi. Gipatawag ako sa miaging buntag didto sa iyang higdaanan; nasulti nila sa ako nga aduna kono'y nahitabo. Sa nahibaloan nako usa siya sa mga unang naningkamot nga paluyohan kining panagtigum dinhi. Siguradong si Satanas ang nagsulay'ng buhaton kadto nga butang sa maong alagad sa Dios. Pero nakita n'yo mismo kung giunsa sa Dios pagbuhat, gibuhat Niya kadto nga mahimong usa ka mahimayaong testimonyo, para ipakita ang Iyang gahum. Iyang pagabuhaton ang tanang butang nga managkaduyog sa pagpamuhat alang sa kaayoan, ngadto kanila nga nagahigugma Kaniya. Mapasalamaton gyud ako nga nadungog kana nga testimonyo, igsoon.

³ Ug usa gyud ka pribilihiyo para kanako ang makaanhi niining siyudad, nga kauban kamo. Kini'y, aba, dili ko maipabati kini, kung unsa gyud ang akong gibati. Karon di man sobra ka daghan ang nanambong, ug mga butang nga ingon niana, nga usahay aduna kita; pero daw sa adunay ginaandam ang Dios nga pagabuhaton mismo, o aduna'y butang nga ginahikay, nga ginapaandam ang mga tawo para sa usa ka butang, ginapabalik ang mga tawo sa linya kung diin sila kinahanglan, ug aron matagbo nila ang buotan nga mga pastor dinhi, ug uban pa nga butang.

⁴ Ug, ania karon, usa ka pribilihiyo para kanako nga makaanhi sa niining lugar karong buntaga aron makawali para sa Full Gospel Business Men. Nasabtan ko nga ang sanga dinhi bag-ohay pa lang nga nagsugod. Gamay pa kaayo, ug sama sa gisulti sa igsoong lalaki dinhi nga nagkinahanglan kono sila og tawo.

⁵ Bueno, mahimong daghan na kaayong dagkung maayo nga mga organisasyon ang—ang girepresentar ko sa tibuok kalibutan, sa tanan nga mga full Gospel, daghan sa mga Baptist

ug uban pa, pero, sa gihapon hangtud karon miyembro ako sa usa ra ka grupo, ug kana mao ang—ang Business Men, tungod kay dili kini nagrepresentar sa unsa mang organisasyon. Sa tinuod lang, kini—kini mao’y inter-ebanghelikal. Wala niini ginarepresentar ang bisan unsa gawas lamang sa full Gospel, ug mao nga malipayon gyud kita tungod niana.

⁶ Ug nahunahuna ko, nga kamo nga kalalaken-an dinhi sa siyudad, nga mao’y. . . Sa tinuod lang, kung motoo kamo kanako nga ang isulti ko kaninyo maoy kamatuoran, kini ang panahon kon diin ang mga full Gospel businessmen puedeng motigum nga magkauban para sa usa ka pagpakig-fellowship. Makakat-on kamo ug mga butang gikan sa usa’g usa, sa ingon niining panahon sa Sabado sa buntag, nga adunay pagwali.

⁷ Ang presidente sa. . . ang internasyonal nga presidente, si Igsoong Shakarian, napaila-ila ako sa iya daghan na nga mga tuig ang milabay. Daghan kaninyo ang nahibalo mahitungod niana, tungod kadto sa mga telegrama nga anaa ibabaw sa lamesa, nga nagkapatong-patong; ug pagkuha ko didto, nakuha ko kadtong mahitungod sa usa ka babaye nga ginganlan og Shakarian, nga naghimalatyon na tungod sa kanser. Ug sa kung unsa nga paagi gipangunahan ako sa Ginoo padulong niadtong lugara, ug didto nako nahimamat ang mga Shakarian, niadtong ang maong babaye naayo. Didto pud nabautismohan si Doktor Theodore Palouveas, samtang, siya ang doktor nila, usa ka doktor nga Griyego.

⁸ Miingon siya, “Ang pinaka ideya, nga ginapalaum mo ang mga tawo ilalum sa sayup nga pagpasabot.” Miingon, “Ang babaye man gud nga nagahigda dinha naghimalatyon na!”

⁹ Niadtong una diay, sa pagsulod ko niadtong balay, ang giingon niya niadto, “Karon sa pagsulod nimo didto,” miingon, “magpuyo ka lang, og maghilum,” miingon, “tungod kay naghimalatyon na ang babaye. Dugay na siyang ingon niana, ug ang duha ka suso niya gitangtay na, ug grabe ang pagpanghupong niya.” Miingon, “Mamatay na gyud siya.” Ug miingon pa, “Wala ka na gyu’y mahimo pa bahin niini.” Ug naminaw lang pud ko og diyutay sa iyang pagpanudlo. Miingon siya, “Karon hilum ka lang. Ayaw pag-ampo nga kusog o unsa man.” Ingon pa, “Isulti lang ang diyutay mong pag-ampo ug balik na dayon diri.”

Ingon ko, “Oo, sir.”

¹⁰ Busa nag-adto na ako. Kabalo man ko nga dili ko puedeng mamati niadto, kabalo na mo. Ug miingon ko nga kami. . . Misaka na ako niadtong hagdanan. Ug atua didto, siguro akong. . . Nahinumduman na nako karon. Misaka ako sa hagdanan. Ug si Florence, niadtong higayona, batan-on pa, maanyag, nga batan-ong gining, ug si Rose ug tanan sila nga atua didto, tanan sila nanag-ampo; ug ang ilang inahan

naghigda didto nga walay panimuot, duha na ka adlaw nga walay panimuot, nga nanghupong na.

¹¹ Ug busa miluhod na ako para mag-ampo. Ug sa pag-ampo ko, miabot ang Manolunda sa Ginoo, didto sa higdaanan, og miingon, “Human sa tulo ka adlaw mobangon siya.”

¹² Pagkahuman mitalikod na ako ug migawas na, ug misunod sila kanako. Ingon ko, “Sa . . . Sa Ngalan sa Ginoo, mobangon siya.” Ug busa nagsugod sila sa pagsiyagit.

¹³ Dayon ania na si Doktor Palouveas, ug pagawason na unta niya ako sa balay. Ug iya lang . . . miingon ko . . . Miingon siya, “Kana gyu’y imong ideya!” Ug miingon ko . . . “Bueno, ginapalaum mo ang mga tawo ilalum sa sayup nga paglaum! Mamatay na ang babaye.”

¹⁴ Ingon ko, “Sumala sa tanan ninyong mga estatistika, ingon gyud niana. Pero sumala sa Pulong sa Ginoo, dili.” Kita n’yo? Ingon ko, “Mabuhi gyud siya.”

¹⁵ “Binuang,” ingon niya, “mas maayo pa nga mopahawa ka na niining lugara, pahawa dinhi.”

¹⁶ Ug miduol si Igsoong Shakarian, miingon, “Kadali lang.” Kita n’yo? Miingon, “Gipaani ka namo dinhi, usab, ingon nga among doktor, ug gipasalamatan ka namo.” Miingon, “Pero gipatawag man pud namo si Igsoong Branham. Ang paglaum unta nga gikan sa imo, wala mo kami hatagi. Pero siya naghatag, kita mo.”

¹⁷ Ug miingon ko, “Sige sultihan ta ka kung unsay buhaton ko. Kung dili man ugaling siya mobangon pag-usab, sulod sa tulo ka adlaw, magbutang ako og karatula sa likod ko nga adunay sulat nga, ‘mini nga propeta,’ ug dayon moadto kita mismo sa Los Angeles, ug magsakay ka sa imong sakyanan, magmaneho ka didto sa dalan, og magbusina-busina ka, nga ginatudlo ako, kita mo. Ug pero kung mobangon siya, tugotan mo pud ko nga butangan og karatula ang imong likod nga, ‘mini nga doktor,’ ug mosakay ako sa imong sakyanan ug magbusina-busina pud, kita mo.” [Nangatawa ang kongregasyon—Ed.] Wala siya misugot. Pero pagkahuman niadto, siya nabautismohan didto sa usa ka kanal sa irigasyon, ug nagapangalagad na sa Ginoo. Nagpadayon na sukad niadto, hangtud nga siya gikuha na ngadto sa Puloy-anan sa Himaya.

¹⁸ Ug busa didto ko nahimamat ang mga Shakarian. Wala magdugay nahimong kabahin ako sa pagtabang kanila nga matukod ang una nila nga chapter. Ug sa tibuok nasud, sa tibuok kalibutan, kaabag ako nila sa ilang mga chapter. Ug sila ang pinaka maayong grupo sa mga tawo.

¹⁹ Nahunahuna ko nga inyong—inyong nasipyatan ang usa ka butang kung dili ninyo lig-onon ang pagpakig-fellowship dinhi, tungod kay pagpakig-fellowship man kini. “Kinahanglan

natong tipunon ang atong mga kaugalingon,” mao kana ang ginasulti kanato sa Biblia, “maingon nga makita nato nga ang katapusan nagasingabot na; dili gyud magsalikway sa atong kaugalingong panagkatigum.” Kini—kini dili lang ingon niana, pagalig-onon pa gyud kamo niini. Ug, kamo, ang inyo mismong kalig-on mao usab ang magpalig-on sa iglesia. Ug kining tanan. . . Ang Full Gospel Business Men dili usa ka organisasyon nga bulag-bulagon kamo, ug moingon, “Amò kining grupo.” Kini para sa tanan nga magtotoo, para magkahiusa. Ug kini usa lamang ka bahin sa iglesia, kita n’yo, sa iglesia mismo, ang espirituwal nga mga magtotoo. Ug sa hunahuna ko nga kini—kini usa ka maayong butang kung inyong—kung inyong buhaton kini. Mora kini og medyo, siguro dili kini’y. . .

²⁰ Dili unta kini medyo panamastamas. Pero adunay usa nga nagsulti kanako dili pa lang dugay, sa usa ka panagtigum, miingon siya, ang sulti niining lalaki, “Hoy, usa man ikaw ka magwawali.”

²¹ Miingon ko, “Bueno, ingnon na lang nato nga ingon niana.” Ako—medyo ako nagpanuko nga magsulti og unsa man mahitungod sa mga magwawali, atubangan sa mga Full Gospel nga mga tawo.

²² Kabalo mo, ang akong—akong amahan usa—usa—usa kaniadto ka mangangabayo. Tagakilatis siya sa mga kabayo para mahibaloan kung luwas ba sakyan ang mga niini. Niadtong gamay pa lang ako nga bata, nahunahuna ko, kabalo na mo, nga mamahimo akong usa ka mangangabayo, usab. Kabalo na mo ang gagmay’ng mga bata gusto nilang mahimong sama sa ilang papa, ug gusto ko nga mahimong usa ka mangangabayo usab. Busa pagmaabtan nako si papa nga atua sa likod niadtong among lugar, kabalo na mo, nga nagadaro, ug dalhon ko didto kadtong pangdaro namo nga kabayo ug dalhon kini didto sa daang lawoganan, kabalo na mo, nga hiniblas gikan sa usa ka troso.

²³ Pila ba ang nakakita na niana, usa ka daang. . . Bueno, unsang parti diay sa Kentucky kamo nagpuyo? Oh! Pila ba ang nakasinati nang matulog sa uhot? Bueno, puede ko sigurong hukason na kining amerikana ko ug kurbata ko, daw sa anaa lang ako sa among lugar dinhi. Bueno, kana—kana—kana ang gikadak-an ko.

²⁴ Busa naandan ko na nga moadto didto. Ug si papa aduna og usa ka pangmuntura sa kabayo, kabalo na mo. Ug pagmakita ko siya nga didto sa likod sa niadtong lugar, ug dal-on ko dayon kadtong pangdaro nga kabayo. Ug pangtapokon ang tanan kong mga igsoon, ug papuwestohon ko sila palibot sa koral, kabalo na mo, ug ako man ang pinaka magwang sa nueve nga magsoon. Molakaw ako og mokuha og usa ka hagkum nga mga cocklebur ug ibutang ilalum sa pangmuntura sa kabayo, ug hugtan nako

kadtong bakus sa montura, ug mosaka na sa pagsakay niini. Grabe! Ang luoy'ng kabayo mora'g kapoy na kaayo nga halos dili na niini maitikang ang iyang mga tiil, ug mobahihi na lang kini ug mangusmokusmo, motugsok man kaniya ang mga cocklebur, kabalo na mo, ug hugot man gud kadtong pagkahigot sa bakus sa montura kaniya. Dayon atua ako nga nagasakay nga patang-tang-tang-tang pa ako sa akong kalo, ug ako gayu'y usa ka . . . Usa na ako ka tinuod nga kabalyero. Daghan na man gud kong nabasa nga magasin, pero hangtud lang ako niadto. Pero napatod nako ang akong mga igsoon nga usa na ako kaniadto ka matuod nga cowboy, nakita n'yo, busa nagdahum gyud ko nga ako ingon na niadto.

²⁵ Niadtong magdise-otso na ako, mibiya ako sa balay ug miadto sa Arizona. “Gikinahanglan nila didto ang sama kanako para tigmanso sa ilang mga kabayo. Sigurado ako niana. Ila lamang. . . Gikinahanglan nila ako, busa kinahanglan kong mobiya sa balay.” Dili pa hingkod ang edad ko niadto, pero miadto gihapon ko, ug nahitabo nga sa pag-abot ko didto sa Phoenix tukma lang gyud nga adunay gipahigayon nga rodeo, kabalo na mo. Busa miadto ako didto para tan-awon ang mga kabayo nga aduna sila, para makita nako kung asa ang akong sakyan. Kadtong mga dili nila masakyan, kadto na lang ang pagasakyan ko, kabalo na mo, gipili ko kadtong kolor pilak ang montura.

²⁶ Mubo gyud ko nga tawo, kaniadto pa mubo na ko daan, ug nahunahuna ko nga mopalit og pares sa chaps. Kabalo ko nga gasul-ob pud si papa ug mga niini. Ug niadtong tungora wala na siya ug ingon niini, ug mao nga nagpalit na lang ko. . . Aduna ko'y nakita nga nindot nga pares, kabalo na mo, nga adunay tatak nga A-r-i-z-o-n-a sa ilalum, og duna pa'y pang-tulisok sa kabayo ug kung unsa pa. Nahunahuna ko, “Oh, grabe, mobagay gyud kana sa ako kung sul-obon ko na,” kabalo na man mo, ang gusto sa kabatan-onan. Gisul-ob nako, pero halos dise-otso pulgada ang sobra niadto nga misagyard na sa salog. Ug mora na hinoon ko og gamay'ng bantam nga manok kon tan-awon, kabalo na mo, nga duna pa'y balahibo. Nahunahuna ko, “Dili gyud magpulos,” busa nakadesisyon ko nga mopalit na lang ko og pares sa Levis.

²⁷ Ug nahunahuna ko, “Makakuwarta man pud ko niini.” Busa migawas ko ug nagtan-aw tan-aw sa tanang mga kabayo nga atua didto, pagka-ihalas nila nga dili gani mokaon og mga uhot, ug atua sila sulod sa pasungan. Nahunahuna ko, “Oh, aba!”

²⁸ Busa sa unang higayon nga gipagawas nila ang usa niadto, nahitabo nga. . . Pagkatalagsaon gyud, nga ginasulti ko kini niining buntaga, wala nako nahunahuna kaniadto karon ko lang gyud nahunahuna; pero ang unang kabayo nga pagasakyan niadtong hapon, didto sa maong indigay, ang ngalan niadto mao'y “Kansas Outlaw,” ug naggikan kadto sa Kansas, mataas

og daku nga disiesieteng-kamot-ang-katas-on nga kabayong ihalas. Ug busa usa ka sikat nga mangangabayo ang angay mosakay niadto.

²⁹ Busa gipuwesto nako ang akong kaugalingon didto sa koral, sama niadtong uban pa nga mangangabayo didto, kabalo na mo, ug miplastar ako didto. Pinaus-os pa gyud kadtong kalo nga ingon niini. Sa hunahuna ko, “Mora na gyud ko og tinuod nga mangangabayo niini,” sa pagtan-aw ko didto.

³⁰ Dayon migawas na didto ang maong lalaki, kumpleto sa kahimanan. Siya—siya, pagkagawas niya didto sa dailosan, sakay niadtong kabayo, gipalamba-lamba siya kaduha o katulo kahigayon og siguro dayon gipataas niadtong kabayo ang duha niya ka tiil sa unahan, ug ang lalaki . . . Mipadulong ang kabayo sa usa ka direksyon, ug ang ang lalaki usab pabali. Gikuha na niadtong mga tigbira sa pisi ang kabayo. Ug gisakay pud sa ambulansya ang mangangabayo, nga nanggawas ang dugo sa iyang mga dalunggan. Ug padayon pa niadto sa paglamba-lamba ang kabayo, ug gikuha na dayon sa mga tigbira sa pisi ang kabayo.

³¹ Pagkahuman nanawag na pud ang tigtawag, “Hatagan ko ang si kinsa man og usa ka gatus nga dolyar nga makasakay sa maong kabayo sulod lang sa napulo ka segundo.” Naglakaw-lakaw siya didto, gikan sa usa ka direksyon padulong sa pikas, ang ingon, mitan-aw siya diretso kanako, miingon, “Usa ka ba ka mangangabayo?”

³² Ug miingon dayon ko, “Dili, sir oi.” Nausab ang akong hunahuna, sa gilayon. Dili man diay ko mangangabayo.

³³ Niadtong bag-ohay pa lang ako naordenahan, sa Missionary Baptist Church, nga dala-dala ko ang akong Biblia ilalum sa bukton, kabalo na mo, nga sama *niini*, ug duna ko’y akong—akong mga kredensyal. Ako—usa gyud ako ka tigpanalipod sa Pagtoo, mao na ang akong gibati kaniadto. Nahunahuna ko nga usa na ako ka magwawali.

³⁴ Usa niana ka adlaw niadtong didto ako sa St. Louis, sa dihang giayo ang batang babaye nga si Daugherty, ug gihunahuna ko nga usa gyud ako ka ministro. Miadto ako didto ug nahinagbo ko ang mga Pentecostal. Ug kini si Robert Daugherty, nga ang uban kaninyo tingali nakaila kaniya. Ug napaminawan ko siya nga nagwali. Ug ang maong lalaki nagwali hangtud nga halos moluhod na siya ug molagum ang iyang nawong, ug matumba sa salog ug makabalik gihapon sa pagtindog, nga ginaapas ang iyang gininhawa, og madungog mo mismo siya bisan duha na ka kanto ang gilay-on, nga nagapadayon gihapon sa pagwali.

³⁵ Ako, sa kinaraan og hinay kong pang-Baptist nga pamaagi dili ako ingon niana ka paspas maghunahuna. Mao nga

kung adunay moingon sa ako, sukad niadto, “Usa ka ba ka magwawali?” Ginaingon ko, “Dili, sir oi.” Medyo tahado na ako.

Usa ka lalaki ang nagsulti sa ako, didto sa Philadelphia . . .

³⁶ Didto kon diin igapahigayon ang sunod nga panagtigum, sa internasyonal. Gilauman nga ako’y magwali sa ika-29, ako ang magpasugod sa panagtigum sa ika-29, para kang Doktor Brown ug—ug sa daghan pa nga mga kaigsoonan. Sa Philadelphia kana, magsugod kana sa ika-29 sa niining bulan. Usa kini ka pribilihiyo para kanako nga pagasugdan ang panagtigum, busa, ug magdapatig og duha ka pamahaw para kanila.

³⁷ Ang sulti sa usa ka lalaki, “Unsa may hinungdan nga sige ka man mouban-uban sa mga Businessmen? Nga usa ka man unta ka magwawali.”

Ingon ko, “Bueno, ako—usa man pud ko ka negosyante.”

Ingon niya, “Bueno, unsa—unsa man sab ang imong negosyo?”

³⁸ Ug ingon ko, “Ang negosyo sa assurance.” Medyo paspas lang kadto nga pagkasulti ko para dili niya masabtan ang buot kong ipasabot, nakita n’yo. Og wala niya mismo nakuha kung unsa’y akong gisulti. Wala ko magsulting “insurance,” ang giingon ko “assurance.”

³⁹ Ingon niya, “Bueno, ako—nalipay ko nga—nga mahibaloan kana.” Ingon niya, “Unsa man, asa man diay ang punoang-buhatan nianang kompanya?” Miingon, “Unsa man nga klase nga insurance kana?”

Ingon ko, “Ang Eternal Life.”

Ingon niya, “Wala pa lagi nako madungog kana. Asa man ang punong-buhatan niana?”

Ingon ko, “Sa Himaya.”

⁴⁰ Busa kung aduna man kaninyo ang interesado, gikalipay kong makig-estorya kaninyo bahin sa policy niini pagkahuman sa panerbisyo.

⁴¹ Ug nahinumdom pud ko, dili pa lang dugay, ang bahin sa insurance. Nagalaum ko nga wala’y ahente sa insurance nga ania karon. Ang akong igsoon nga lalaki usa ka ahente sa insurance, tuod, sa Prudential. Busa nasulti na nako kaniadto ang bahin niadtong gamay’ng di-maayo nga kontrata ko sa usa ka insurance usa niana ka panahon. Ug wala man lang nila gibasa sa amo og tarung kadtong policy, ug si papa nagtrabaho niadto mga napulo ka tuig para sa baynte-ka-tuig, nga madawat unta nga usahan ra nga tibuok, sa pagdahum namo. Pero niadtong andam na unta nga kuhaon kadtong kuwarta, ang kantidad niini hinoon pito ra ka dolyar ug singkwenta sentimos, ug ang bug-os namong pagdahum moabot kadto og kantidad nga gatusan ka dolyar. Pero, ug ako—wala gyud ko kasabot

niadto. Okay lang man pud, maayo man ang insurance, kung hunahunaon; wala ko kana ginapakaubos. Maayo man kana.

⁴² Busa duna ko'y higala sa insurance, o nagaahente kaniadto og insurance, ang buot kong ipasabot, usa ka lalaki nga nakauban ko sa pag-eskwela kaniadto; ang iyang igsoon, nagasulat para sa *The Upper Room*, buotan kaayo nga ministrong Baptist. Busa giadtoan ako ni Wilmer og gihanyagan ako, usa niana ka adlaw, miingon, "Billy, mianhi ako para estoryahon ka unta bahin sa insurance."

⁴³ Ingon ko, "Bueno, Wilmer," ingon ko, "Sultihan ta ka, dugay na kitang magkahigala," ingon ko, "ug tanan na." Ingon ko, "Kung gusto nimong hisgotan ang mahitungod sa kahimtang sa panahon, o—o mahitungod sa unsa pa man nga butang, sige, pero mahitungod sa pagpangisda o kung unsa man. Andam pud ako nga makig-estorya bahin niana. Pero . . ."

Karon ang ingon niya, "Bueno," miingon, "gikinahanglan nimo ang insurance."

Ug miingon ko, "Aduna na ko'y assurance."

⁴⁴ Ug miingon siya, "Oh pasens- . . . Kung ingon niana si Jesse," ang akong igsoon nga lalaki, "nabaligyaan ka na diay niya og usa ka policy?"

⁴⁵ Ingon ko, "Wala man." Ug mitan-aw kanako ang akong asawa ingon nga mora ako og usa ka tigpakaaron-ingnon, kita n'yo, tungod kay nahibalo man siya nga wala ako'y insurance. Mao nga nga mitan-aw siya kanako. Ug miingon ko, "Oo," miingon ko, "duna na ko'y assurance."

⁴⁶ Miingon, "Unsa man diay kana?" Ug miingon ko:

Mapanalanginong assurance, nga si Jesus anaa kanako!

Oh, pagkaanindot nga pasiuna sa Balaanong himaya!

Usa ako ka manununod sa kaluwasan, nga gibayran na sa Dios,

Natawo na sa Iyang Espiritu, og hinugasan na sa Iyang Dugo.

⁴⁷ Ingon niya, "Billy, maayo man kana, pero dili ka man niana maibutang sa lubnganan."

⁴⁸ Ingon ko, "Apan ipahigawas man ako niini. Wala ko—wala ko ginakabalak-an ang mapahimutang dinha; ang akong ginakabalak-an ang mapahigawas."

⁴⁹ Mga negosyante, ania gihapon ko nianang negosyo. Kung gusto n'yo hisgotan kana nga butang kauban ako, ikalipay ko nga buhaton kana kaninyo.

⁵⁰ Pero usa ka dakung butang ang magkaaduna og pagpakig-fellowship. Nagatoo ko nga nakasulat kana mismo sa Kasulatan,

“Pagkatam-is ug pagkamalipayon gayud sa mga magsoon nga managpuyo sa paghiusa. Sama kini sa lana nga igdidihog diha sa mga bungot ni Aaron, nga midaligdig diha sa mga sidsid sa iyang bisti.” Aduna gyu’y sa kung unsang maanindot nga butang diha sa pagpakig-fellowship!

⁵¹ Ang nag-inusarang Dios, sa sinugdanan, Siya nahimo lamang nga Dios. . . Dili pa gani Siya Dios, sa sinugdanan. Nahibalo ba mo niana? Dili man gud mahimo. Ang *Dios* man gud mao’y usa ka “butang nga silimbahon,” sa pinulongang Iningles. Kita n’yo? Siya kaniadto mao si Elohim, ang Bugtong nagalungtad sa kinaugalingon; dili pa gani Siya Dios. Pero diha Kaniya mao ang mga kinaiya, sama na lang nga kamo adunay hunahuna. Kita n’yo? Ang inyong hunahuna, nagkinahanglan kong makita ang usa ka butang, ug dayon. . . Hunahunaon ko kini, ug dayon isulti. Ug ang pulong mao ang hunahuna nga napahayag. Busa, “Sa sinugdanan mao ang Pulong, ug ang Pulong kauban sa Dios, ug ang Pulong napadayag,” kita n’yo, naipahayag.

⁵² Ug karon ang tanan magkapareho ra. Sama kanato, natawo pag-usab, aduna kita’y Kinabuhing Walay Katapusan. Kung aduna kita og Kinabuhing Walay Katapusan, aduna’y usa lamang ka porma sa Kinabuhing Walay Katapusan, kana ang Dios. Ug mga kinaiyahan kita Niya. Karon mahimo akong mosulti nga ingon niini taliwala sa mga Cristohanon. Mga kinaiyahan kita. Ug si Jesus mianhi ingon nga usa ka Manunubos. Pili ba ang nagatoo niana? [Nagaingon ang kongregasyon, “Amen.”—Ed.] Ang pagtubos, dili buot ipasabot nga naghimo og bag-o. Ang buot ipasabot sa pagtubos maoy ipahibalik sa kung unsa kini kaniadto. Kita n’yo? Busa unsa ma’y inyong gikahadlok? Kita n’yo? Ang tanan—ang tanan anaa mismo sa Iyang mga kamot, dili sayup ang pagtiktak sa orasan. Ang tanan nga butang kinahanglan mamaingon niini gayud, ug ginadala kita niini sa ingon niini nga kahimtang karon. Karon. . .

⁵³ Ug nagasalig ako ug nagalaum gayud nga ang matag usa kaninyo nga kalalaken-an nga ania karong buntaga, nga dili pa miyembro niining maanindot nga pagpakig-fellowship, nga makig-estorya kamo sa niining buotang lalaki dinhi, nalamano nako ang iyang kamot karon lang, ang—ang presidente sa niining sanga. Ug lig-onon ang inyong kaugalingon! Gisulti mismo ni David nga gilig-on niya ang iyang kaugalingon batok sa kaaway. Ug kaninyo nga mga kalalaken-an, inyong—inyong—gusto ninyong buhaton ang tanan nga butang nga mahimo ninyo para lig-onon ang kaugalingon ninyo batok sa kaaway. Ania kita dinhi ingon nga full Gospel nga mga igsoon, kita n’yo. Kita mismo nagatoo Niini. Manglihok kita, ug mosangyaw ug dapiton ang uban pa nga mga igsoon ug dalhon sila pasulod, full Gospel man sila o dili, ug dalhon sila sa atong—atong mga panagtigum.

Ug mag-ampo ug buhaton ang atong bahin para malig-on pa ang Lawas ni Cristo, ug, sa ingon niana, napalig-on nato ang atong mga kaugalingon. Ang Dios magauban kaninyo, tabangan kamo. Unsa mang oras nga ako mamahimong katabang sa inyo, pahibaw-a lang ko. Karon ato na, sa dili pa kita moduol sa Pulong . . .

⁵⁴ Dili ko gustong dugayon pa kamo dinhi. Ako—medyo ako . . . Ingon sa gikasulti ko na kaganina, “Medyo hinay gyud ko, kabalo na mo, ug mora’g kinahanglan ko pa nga hunahunaon kini og hinayhinay.” Ug—ug ang panghunahuna ko dili ingon ka alisto, sa pagsugod, busa medyo kinahanglan ko usá mag-isto-istorya; ug wala ma’y akong kaugalingon kahibalo gawas lamang sa kung unsa mismo ang isulti Niya kanako nga isulti, ug mao nga nabutang ako sa alanganin usahay, pero ginasalbar man pud ko pagawas niini sa daghan na nga higayon, busa ginasulti ko lang man kung unsa ang gisulti Niya. Pero sa dili pa kita moduol sa Pulong, modangop usá kita sa Magsusulat.

⁵⁵ Usa ka higayon kaniadto, kauban nako sa pagbiyahe ang usa ka inila nga Doktor sa Dibinidad, daghan kaninyo tingali ang nakaila kaniya, kang William Booth-Clibborn, ug ginawali niya ang Maayong Balita gamit ang pito ka pinulongan. Ug ginahisgotan namo niadtong higayona ang mahitungod sa Dios ug ang Iyang mga kinaiyahan. Ug nagahisgot ako bahin niadto, miingon, “Daw sama sa diamante, ang Dios.” Kita n’yo? Ug miingon ko, “Kung ingon-niana kining mga gasa nga imong ginahisgotan,” miingon ko, “kini sila—kini sila mga repleksyon lang sa gugma sa Dios.” Ug miingon ko, “Sama sa Africa, niadtong kita . . .”

⁵⁶ Ang presidente sa minahan, didto sa Kimberley, usa siya sa akong mga tigbantay sa linya. Gidala niya ako didto sa minahan sa mga diamante sa—sa Kimberley. Grabe, makita ninyo ang mga niini nga nakakatag lang diha sa dalan, pero dili ninyo puedeng gunitan gawas lang kung naputol og naporma na kadto mismo. Gikinahanglan man gud ang asosasyon ang magputol niadto. Busa ang usa ka daku og bililhon nga diamante, wala kini og kinlaw pagnamina ninyo kini. Wala gyud, kinahanglan nga maputol usá para mamaingon niana.

⁵⁷ Ug ingon niana ang Dios, ug gikinahanglan Niya nga masamaran tungod sa atong mga kalapasan, ug mapangos tungod sa atong mga kasal-anan. Siya ang daku nga Diamante. Ug dayon kung putlan ninyo ang diamante, (namatikdan ba ninyo?) putlan gani ninyo kini nga magkaaduna og tulo ka kanto, ug pagmasidlakan kini sa adlaw magreplektar kini og pito ka kolor. Kita n’yo? Ug kung tan-awon n’yo, ang pula niini palahus sa pula, ang makita puti. Nakahibalo ba kamo niana? Husto kana. Gamit ang pula lahus sa pula, mao ang Dugo, ang pulang Dugo nga nagatan-aw niadtong usa ka . . . Ang Dios nga nagatan-aw ngadto sa usa ka pulang makasasala, pinaagi sa

pulang Dugo, nagapahimo nianang makasasala nga puti. Siya anaa sa sulod sa kasingkasing, nakita n'yo.

⁵⁸ Ug—ug busa karon, tungod niana, miingon ko, “Ang Dios gisapsap, giputol, gisamaran, para mareplektar sa niining mga silaw, nga sa pag-igo niini sa—sa halangdon nga Pulong sa Dios, mareplektar kung unsa gyud ang Dios.”

⁵⁹ Ug tungod niini miingon kini si Mr. Clibborn, “Wala gyud ka mahibalo sa imong Biblia.”

⁶⁰ Ingon ko, “Mahimong matuod kana. Pero nakaila ako’g maayo sa maong Tagsulat. Busa mao kana—mao kana ang pinakamahinungdanon nga butang, kung nakaila ba gyud sa Tagsulat.” Ang pag-ila Kaniya, bisan naila mo pa ang tibuok Pulong, o wala; ang pag-ila lamang gayud Kaniya!

⁶¹ Nagatoo ko nga si Hudson Taylor kaniadto ang miingon sa usa ka batan-ong misyonero usa niadto ka higayon. Miingon ang batan-on, “Mr. Taylor, bag-ohay ko lang nadawat ang Balaang Espiritu,” miingon pa, “kinahanglan pa ba nako nga mokuha og Bachelor of Art?” Ingon niya, “Ayaw padan-aga ang kahayag kung ang kandila katungang-upos na. Padan-aga na kini samtang nagasiga pa.” Husto. Sa ato pa, kung wala ka kabalo kung unsa ang isulti mo, isulti lang kung giunsa ang pagsiga niadto. Igo na kana.

⁶² Ug kamo nga mga Full Gospel Business Men ingon niana usab ang inyong buhaton. Dili ninyo—dili kinahanglan nga maghulat pa nga mamahimong ministro; magpamatuod ka lang kung unsa mismo ang nabuhat na Niya kanimo. Mao kana ang tumong nga kamo nanagkatigum dinhi, ang magtestimonyo kung unsa ang nabuhat na Niya para sa inyo. Kana ang magpadan-ag og Kahayag ngadto sa uban pa para sila mapasiga pud niana. Sa ingon nianang paagi ginapasiga ang mga suga didto sa tabernakulo, ang siga niadtong usa mao’y magpasiga sa usa pa; dili kahayag nga gikan sa gawas, nga bag-ong kahayag; kondili ang mao ra gihapon nga kahayag. Ang buot ipasabot, ang mao ra gihapon kini nga Dios gikan sa sugod hangtud sa katapusan, nga nagapadan-ag sa Kahayag.

Makigsulti kita karon sa niining halangdon nga Tagsulat samtang ginaduko nato ang atong mga ulo.

⁶³ Langitnong Amahan, ang pagduol namo karon nga nagkahiusa diha sa Langitnong mga dapit: Nasayod kami, nga kini, dili usa ka gambalay sa simbahan; walay pagduhaduha nga ang mga Kiwanis ug ang daghang nagkalainlaing mga grupo, ang Lions ug tanan na, nagakatigum pud dinhi. Pero niining buntaga usa kini ka iglesia tungod kay ang—ang mga delegado sa Ginghamlan magkauban man nga nagkatigum. Ug nabati namo, maskin, karon pa lang, gikan sa niining mga testimonyo ug mga pag-awit, kami—nahibalo kami nga ania kami sa Presensiya sa halangdon nga Hari. Nahibalo kami nga ania Siya.

64 Ug karon kami, ingon nga mga bata, sa paghalad namo sa Imo og mga pagdayeg gikan sa among mga ngabil, oh, tingali dili hapsay pero, Ginoo, mga bata pa man gud mi, mao nga nahisabtan Mo kini. Bisan unsaon pa namo paggamit sa among—among maayong pamatasan ug salabutan, mahimong dili gihapon kini nagagikan sa kasingkasing, nan usa ra kini ka artipisyal nga butang para maipakita lang. Pero kung kami, nga nagagikan gyud sa among kasingkasing, maghalad nganha Kanimo og mga pagsimba nga gikan sa kinasuloran namo para Kanimo, sigurado ko nga madawat gyud kini.

65 Karon nagaampo kami nga Imong bugkason kami sa pisi sa Espiritu Santo, hiusahon ang among mga kasingkasing, ug makigsulti kanamo pinaagi sa Pulong sa Dios.

66 Panalangini kining gamay'ng sanga, Ginoo, hatagi kini og kusog. “Ako nga Ginoo ang nagtanum niini, pagabisbisan Ko kini adlaw ug gabii, bisan aduna pa’y moagaw niini gikan sa Akong kamot.” Nangamuyo ako, Ginoo, ingon nga Imong alagad, panalangini sila. Lig-ona sila, Ginoo, alang sa Gingharian.

67 Panalangini ang matag iglesia nga nairepresentar dinhi niining buntaga, ug ang matag tawo. Ug kung adunay pipila dinhi niining buntaga nga—nga dili pa luwas, ako—nangamuyo ako, Ginoo, nga kini na mismo ang oras nga maamgo nila nga kung sa ila lang kaugalingon dili sila igo para atubangon ang kamatayon, nga tungod niini madawat nila ang—ang gasa sa Kinabuhing Walay Katapusan pinaagi ni Jesus Cristo nga Imong Anak. Tungod kay amo kining gipangamuyo sa Imong Ngalan. Amen.

68 Karon, sa mga panagtigum, sa tan-aw ko nagwali na ako kaninyo sa ingon ka mabagison ug tanan na, sa mga panagtigum, mao nga dili na ako maghisgot, magwali og usa ka sermon. Ug sa hunahuna ko pud nga dili husto nga magpahigayon og—og panagtigum nga wala’y pagbasa sa Pulong, ug mamulong nga walay bisan gamay ra nga bahin sa Pulong. Busa aduna ko’y gipili gikan sa Pulong dinhi, nga usa—usa ka hamubong drama, usa ka hamubong estorya. Pipila sa inyo, nasulti ko na kini duha o tulo ka higayon, pero sa hunahuna ko maayo sa gihapon kini nga madungog n’yo pag-usab, nga mapahanugotan n’yo ako nga makaestorya og diyutay bahin niini.

69 Akong—akong basahon gikan sa Libro ni San Lucas, sa ika-19 nga kapitulo, sugod sa unang bersekulo. Usa kini ka talagsaon kaayo nga gamay'ng teksto, kung hunahunaon nga angay ba kining hisgotan sa lugar nga nga sama niini. Pero bisan pa niana dinihogan ang tibuok Pulong, kanunay'ng tukma sa Iyang posisyon, ug nagasalig ako nga dalahon sa Dios kining Pulong ug ipahiluna Kini sa husto kon diin Kini angay'ng mapahiluna niining buntaga.

. . . si Jesus misulod ug miagi sa Jerico.

. . . ania karon, usa ka lalaki nga ginganlan si Zaqueo, ug siya punoan sa mga maniningil sa buhis, ug siya dato.

Ug siya naninguha sa pagtan-aw kung kinsa—kinsa si Jesus; . . .

⁷⁰ Tugoti nga basahon ko kini pag-usab, tungod kay gusto ko nga hatagan kini og punto.

Ug siya naninguha sa pagtan-aw kung kinsa si Jesus; ug wala siya makahimo tungod sa panon, o kay siya ugod mubo man.

Ug midalagan siya nga nag-una ug misaka sa usa ka kahoyng sicomoro aron sa pagtan-aw kaniya: kay moagi man siya didto.

Ug sa nakaabot na si Jesus niadtong dapita, siya mihangad, ug nakita siya, ug miingon kaniya, Zaqueo, pagdali, . . . mokanaug ka; kay karong adlawa kinahanglan ako moabot sa imong balay.

⁷¹ Hinaut nga igadugang sa Ginoo ang Iyang mga panalangin sa pagbasa Niini, sa Iyang Pulong.

⁷² Kining lalaki, mubong tawo, ang esena nato mag-abli didto—didto sa Jericho. Karon, ang Jericho ang pinakaubos nga siyudad sa—sa Palestina, ug atua kadto nahimutang sa walog. Ug—ug ang Jerusalem atua nahimutang sa—sa bukid, ibabaw sa bungtod.

⁷³ Ug kung namatikdan ninyo, si Jesus, niadtong miabot Siya sa yuta, gibansagan Siya kaniadto, sa taliwala sa mga tawo, og pinakaubos nga bansag nga mahimong ibansag. Sa pag-anhi Niya, gitawag Siya nga “Beelzebub,” kadto ang pinakadautang ngalan nga gibansag nila Kaniya, nga, “usa ka yawa, usa ka manghihimalad, dautan nga espiritu.” Gipasanginlan nila nga ang Iyang buhat kono usa ka buhat sa dautang espiritu. Kadto ang iglesia nga di-andam, para dawaton Siya, mao nga gihatagan nila Siya og makahahadlok nga ngalan, “Beelzebub.”

⁷⁴ Ug miabot Siya kaniadto, sa pinakaubos nga pagkapanganak nga mahimong maipanganak, sa usa ka mag-uuma nga inahan, ni wala man lang lugar nga kahigdaan unta para—para ipanganak ang maong masuso. Ug ang Iyang lampin, sumala sa gikasulti kanato, gikuha kadto gikan sa yugo sa usa ka baka, nga gigamit nila pangputos Kaniya, didto sa pasungan, sa mabaho nga kuwadra, sa mismong kalibangan sulod sa kuwadra. Ug ang kuwadra dili man lang desenting kuwadra; gamay’ng langob lang sa kilid sa bungtod.

⁷⁵ Ug nagpakighilambigit Siya sa pinakaubos, sa pinakakabus nga mga tawo. Ug gisalikway Siya sa mga anaa sa labing hataas nga katilingban. Gisalikway Siya sa Iya Mismong katawhan, sa iglesia nga angay unta nakaila Kaniya, pero wala nila maila. Wala sila nabansay diha sa Pulong, para maila unta Siya.

⁷⁶ Ug makita nato pag-usab nga miadto Siya didto sa pinakaubos nga siyudad sa Palestina, ang Jericho. Dili ko lang mahinumduman kung pila ka pye ang ubos niadto sa lebel sa dagat, ubos gayud. Gipakaubos Niya og ayo ang Iyang Kaugalingon hangtud ang pinakagamay'ng tawo sa siyudad kinahanglan pa niini nga mokatkat sa usa ka kahoy para lantawon Siya sa ubos.

⁷⁷ Pero ingon niana ang gihunahuna Kaniya sa kalibutan. Gipahamtang nila ngadto Kaniya ang pinakamapait, pinakamabug-at nga kamatayon nga mahimong mamatay ang si kinsa man nga tawo; namatay Siya ingon sa usa ka kriminal. Ang pinakamakaulaw nga pagkamatay nga mahimong mahitabo Kaniya, gihubo sa Iya ang Iyang mga bisti; ug, siyempre, nakita n'yo sa mga bantayog, ug uban pa, nga may nakaputos Kaniya og gamay'ng panapton. “Pero wala Niya panumbalinga ang kaulawan.” Ilang gihuboan Siya sa tanang bisti nga sul-ob Niya, og gilansang Siya sa usa ka krus, sa kaulawan. Ang pinakaubos, pinakamabug-at nga kamatayon nga mahimong ipahamtang, mao ang gipahamtang nila Kaniya. Ug ingon niana ang paghunahuna sa kalibutan ngadto Kaniya.

⁷⁸ Pero lahi ang paghunahuna sa Dios Kaniya hangtud Iyang gihatagan Siya og usa ka Ngalan nga labaw sa tanang mga ngalan nga maipangalan diha sa Kalangitan o sa yuta man. Gibayaw Siya sa hataas kaayo hangtud, nga ang Iyang trono pagkahataas kaayo, nga kinahanglan pa Niya nga modungaw aron malantaw ang Langit. Ingon niana ang paghunahuna Kaniya sa Dios. Sigurado ako nga ingon niana ang paghunahuna nato sa niining buntaga, usab. Labaw sa tanang ngalan, labaw sa tanang ngalan nga mahimong ipangalan. Ang tanang pamilya gani sa Langit ug yuta ginganlan og “Jesus.” Ug pinaagi niining Ngalan, ang tanang—tanang tuhod magaluhod mismo, ug ang tanang dila magadayeg Niini.

⁷⁹ Si Zaqueo usa—usa ka magpapatigayon sa siyudad sa Jericho. Ug siya dili ikalimod nga usa—usa ka buutan nga tawo sa kaugalingon niini. Siya—siya kaniadto, ingnon na lang nato, nga siguro, ingon nga siya buutan nga tawo, siguradong miyembro siya sa kung unsa nga simbahan, nga usa sa mga denominasyon niadtong panahona. Ingon na lang nato nga usa siya ka Fariseo.

⁸⁰ Ug siya, sa tinuod, wala gyud siya mouyon sa mga opinyon sa iyang asawa. Ingon na lang pud nato nga ang ngalan sa iyang asawa mao si Rebekah. Ug wala gyud siya mouyon sa panglantaw sa iyang asawa, tungod kay ang asawa nagtoo man kang Jesus. Nagtoo ang asawa kang Jesus kung unsa mismo Siya, ang Mesias, tungod kay nakita man niya Siya nga ginabuhat mismo ang ilhanan sa pagka-Mesias. Si Rebekah, ingon nga usa ka Hebreohanon; ang mga Hebreohanon nagatan-aw sa mga ilhanan ug mga propeta, tungod kay mamahimong ingon man

niana ang ilang mensahero. Mao kana ang hinungdan nga kon nganong dili nila angay'ng masipyatan nga maila Siya, tungod kay Siya moabota'y man, “nga Anak sa tawo.”

⁸¹ Basaha ninyo ang ubang bahin nga nagahisgot bahin kang Zaqueo: “Kay ang Anak sa tawo mianhi aron sa pagpangita ug sa pagluwas niadtong nangawala. Siya ang Anak ni Abraham.”

⁸² Niadtong, giakusahan nila si Jesus nga nag-uban-uban sa mga makasasala. Busa makita nato nga angay unta nga masabtan nila kadto, pero wala sila makasabot. Aduna sila og ilang teolohiya nga—nga kinahanglan magkinabuhi nga maayo ug mamahimong buutan nga mga tawo, ug uban pa, pero wala nila masabti kung unsa gyud ang ilang mamahimong Mesias.

⁸³ Kabalo ba mo nga mahimong mautro kana pag-usab? Madali ra kaayo kana nga mahitabo, nga puede nato kini nga masayup sa pagsabot sa kung unsang paagi. Karon adunay usa lamang ka paagi nga makasigurado, kana ang, susihon kung unsa Siya. Dayon, ang ingon sa Kasulatan, “Siya mao sa gihapon.” Susiha kung sa unsang paagi Niya igapadayag ang Iyang Kaugalingon sa kaulahi pang panahon. Nahisulat na. Kita n'yo, Siya dili gayud mobuhat og bisan unsang butang gawas nga ipadayag uná Niya kini. Giingon Niya kana mismo sa Kasulatan, “Dili Siya magbuhat og bisan unsa, gawas nga Iya kining ipadayag ngadto sa Iyang mga alagad ang mga propeta.” Ug Iya nang gipadayag Kini. Ug *Kini* ang Iyang propeta, *Kini* mao'y usa ka Basahon sa propesiya, Kini ang bug-os nga kapadayagan ni Jesus Cristo, sukad pa kaniadto. Walay bisan unsa nga igadugang, o taktakon gikan Niini. Ug kinahanglan natong susihon Kini ug tan-awon kung unsa nang panahona ang atong gipuy-an, tungod kay basin unya mahulog kita sa mao rang lit-ag niadto.

⁸⁴ Busa makita nato nga nianang panahona, kining si Zaqueo, kining mubong tawo nato niining buntaga, kining negosyante sa—sa Jericho, atong. . . siguro miyembro siya sa Kiwanis, kung aduna ma'y ingon niana, o usa ka butang nga sama niana. Siya—siya siguro miyembro sa kung unsang inila nga kapunongan didto, didto sa Jericho. Dili ikalimod, usa gayud siya ka dungganon nga lalaki sa iyang—iyang panahon, ug miyembro siya sa simbahan.

⁸⁵ Pero ang dili maayo lang nga butang nga makita nato, nga midapig siya sa modernong opinyon, sa popular nga opinyon, mahitungod kang Jesus. Ug samtang si Jesus man ang Pulong; ug ang Pulong, nga napadayag, mao si Jesus. Kita n'yo? Ug busa nahitabo nga midapig siya sa—sa pikas nga popular nga opinyon nga si Jesus kono dili usa ka propeta, nga usa lamang Siya ka—ka—ka. . . dili ko unta gustong isulti kining pulonga, ingon sa tawag nato niini karon, tiglingla, usa ka nagapaaron-ingnon lang.

⁸⁶ Pero, makita ninyo, mahimo man ni Satanas ang pagsundog-sundog niana sa ingon nga mora'g tinuod gyud hangtud nga malisud na masayran kung asa ang husto o sayup. Gisulti ni Jesus nga mao kana ang mahitabo sa kaulahiing mga adlaw, daghan na kaayong pagsundog-sundog, nga sama ni Jannes ug Jambres nga misupak kang Moises kaniadto.

⁸⁷ Hinumdumi, sila nga duha ka lalaki makahimo sa bisan unsa nga buhaton nila Moises ug—ug ni Aaron. Pero ang butang lang niini nga may kapadayagan si Moises, ug usa ka gipamatud-an. . . Bueno, wala siya miabot, sila Jannes ug Jambres, para ipagawas nila ang mga ulipon. Si Moises ang miabot sa Ngalan sa Ginoo, aron ipagawas ang mga ulipon, kita n'yo, tungod kay kadto man mismo ang nahisulat. Gisulti nila kang Abraham, “Ang imong kaliwatan mamahimong dumuloong sulod sa upat ka gatus ka tuig, pero Akò sila ipahigawas.” Busa si Moises adunay MAO KINI ANG GINAINGON SA GINOO. Pero mahimo nila nga sundogon ang unsa man nga matang sa gasa nga mahimo nila nga buhaton. Ingon nga nahibalo na sila niini, wala nila panumbalinga ang ilang mga manunundog, nagpabilin sila mismo dinha sa Pulong. Dios ang nagpamatuod sa kaulahian.

⁸⁸ Ug kabalo ba mo nga gisulti Niya nga ingon niana ang mahitabo sa kaulahian nga mga adlaw, “Maingon nga si Jannes ug Jambres misupak kang Moises, maingon man usab kining mga tawhana nga dunot ang pagpanghunahuna, mahitungod sa Kamatuoran.” Husto kana, kita n'yo, mga pagpanundog lang. Busa nagpahinungdan kini og gamay'ng kalibog sa mga tawo.

⁸⁹ Usahay ginakasab-an mo sila, pero kini—dili kini tungod nga di mo sila gusto. Tungod kini nga aduna ka og pagpakabana sa ila.

⁹⁰ Unsa kaha kung adunay, imong gamay'ng anak nga atua didto sa tunga sa dalan, ug sa paggawas mo didto moingon dayon ka, “Junior, anak, dili ka baya angay molingkod dinha”; moingon siya, “ayaw panghilabot sa uban”? Siguradong hatagan mo gyud siya og usa ka gamay'ng. . . Unsa gani ang tawag ninyo niini, sama niadtong ginahatag kanako sa akong papa? Usa ka posterior protoplasm stimulation. Ingon ba niana, ingon-ana ba ang paglitok niana? Mao kana ang gikinahanglan nianang bata.

⁹¹ Ug busa ingon-ana ang angay ihatag usahay sa iglesia; dili tungod nga dili mo gusto si Junior, kondili tungod nga aduna ka og pagpakabana kang Junior. Kita n'yo? Ang gugma nagapanul-id.

⁹² Kaniadto, si Jesus dili man dautan ngadto kanila. Gimahal Niya sila, ug gikinahanglan Niyang itul-id sila.

⁹³ Busa makita nato kining mubo nga lalaki ug si Rebekah, nga iyang asawa. Ug ang asawa niya nagtoo gyud nga si Jesus usa ka propeta, ang Propeta mismo. Gatasan ka gatus ka tuig na nga sila wala og propeta. Pero nasayod sila nga ang sunod nga

motungha sa esena, ang sunod nga matuod nga propeta, Siya na mismo. Kita n'yo, nasayod gyud sila nga moabot gyud, tungod kay gipropesiya na man. Busa naundang ang pag-abot sa mga propeta, ug dayon miabot Siya sa esena. Ug nakita ni Rebekah ang ilhanan nga pang-Mesias, ug nahibalo siya nga kadto mao ang Pulong. Kita n'yo, iya mismong nasusihan kadto.

⁹⁴ Busa ang atong drama nagasugod dinhi. Siguradong makalilisang kadto nga gabii para niadtong mubo nga lalaki. Makahigwaos kadto nga gabii nga, ug dili siya makatulog. Siya—siya nagaligid-ligid lang, sa iyang unlan, sa tibuok gabii. Daghan kanato ang nahibalo kung unsa gyud ang ingon nianang mga gabii.

⁹⁵ Nakita n'yo, nahibaloan ni Rebekah. Aduna siya'y koneksyon sa mga tinun-an, ug uban pa. Nahibaloan niya nga si Jesus mosulod sa siyudad pagkasunod buntag. Ug ingon na lang niadto ang interes niya sa iyang—iyang bana, nga gusto niya sa iyang bana nga maatubang gyud mismo si Jesus. Ug ang usa ka tawo man gud kung magtindog siya sa atubangan Kaniya, aduna gyu'y sa kung unsang epekto kanim. Dili man gud Siya susama lang sa ubang tawo. Lahi gyud Siya. Ug gitinguha ni Rebekah nga makita gyud si Jesus sa iyang bana, makita ang Iyang buhat, ug mahibaloan nga Siya mao gayud ang Mesias. Bisan pa, ang mga saserdote ug sila nga atua didto nanag-ingon, “Walay pulos kana. Mini kana. Usa lang—usa lang kana ka lingla.” Pero si Rebekah nagtoo gayud, busa nag-ampo siya.

⁹⁶ Karon, Rebekah, kung may tinguha ka nga ang imong negosyanteng, si Zaqueo, mapaatubang gayud sa atubangan ni Jesus, magsugod kang mag-ampo, siguradong dili gayud siya mapahimutang.

⁹⁷ Busa niadtong haduol na moabot ang oras, nga, pagkasunod buntag, moagi na si Jesus niadtong dalan. Pero nianang tibuok gabii nag-alimpasa na ang bana didto sa higdaanan, ug luoy kaayo siya. Ug atua pud si Rebekah, nga nagahigda didto, nagaampo. Ug dili gyud ikalimud niadtong gabhiona, pagmakamata sila, moingon si Rebekah, “Salamat Kanimo, Ginoo, nahibalo ko nga nagapanglihok Ikaw diha kaniya.”

⁹⁸ Mao nga kung makita mo ang imong Zaqueo nga dili makatulog, moingon ka na lang, “Salamat, Ginoo, nagapamuhat gyud Ka diha kaniya karon.” Kung makita mo siya nga bagutbuton, nga did-an ka na niya sa pag-adto sa simbahan, kita n'yo, “Magpahilayo ka nianang pundok! Ayaw na pag-adto didto bisan kanus-a! Walay pulos Kana!” Magmapailubon lang. Nagapamuhat ang Dios, makita mo. Ingon niana ang pamaagi Niya sa pagbuhat niini, kita n'yo. Wala gyud nakatulog ang bana nga dili niya malikayan kadto.

⁹⁹ Busa makita nato, pagkasunod buntag, sayo pa kaayo, kining atong tawong ginahisgotan mibangon sa higdaan ug

miadto na didto ug gipasul-ob niya ang iyang kaugalingon og pinakaanindot niyang bisti, kabalo na mo, gamit ang iyang pinakamaanindot nga kupo nga aduna siya, ug gihapsay ang iyang balbas ug gisudlay ang iyang buhok. Ug gisil-ip siya ni Rebekah nga atua pa niadto ilalum sa habol ug ginalantaw ang iyang bana. Nahibalo siya nga niadtong tungora mismo aduna gyu'y sa kung unsang butang nga nagapamuhat. Nahitabo nga pasimpleng midungaw ang bana didto sa bintana, ug milingi pa ug mitan-aw kung nakatan-aw ba ang iyang asawa, nga mata na. Wala, tulog pa ang iyang asawa, maoy iyang hunahuna. Gipataas niya ang kurtina ug mitan-aw sa gawas, ug gabanagbanag na, busa giandam na niya ang iyang kaugalingon.

¹⁰⁰ Nakita n'yo, sa dihang magaampo kamo para sa usa ka tawo, aduna gyu'y butang nga mahitabo. Dinha kita nangapakyas, mga higala, nga dili man lang mag-ampo. Ang pag-ampo mao'y yawi. "Pangayo ug magadawat kamo. Kamo wala managpakabaton tungod kay kamo wala man mangamuyo; kamo wala man mangamuyo tungod kay kamo wala man motoo. Mangayo og daghan, aron mamahingpit ang inyong kalipay. Mangayo ug toohi nga managpakabaton kamo sa kung unsa ang inyong gipangamuyo." Dayon manghawid gayud niini. Ayaw gayud buhii. Kung kini usa ka saad sa Biblia, ug nahipadayag na kini kanimo nga igahatag kini kanimo sa Dios, manghawid gayud niini.

¹⁰¹ Sa ingon nianang paagi niya kadto—niya kadto naangkon. Napadayag kadto kang Rebekah nga ang iyang Zaqueo mamaluwas, busa nanghawid gayud siya niini.

¹⁰² Mao nga sa dihang pagawas na si Zaqueo sa pultahan, miingon si Rebekah, "Zaqueo, nganong na pa sayo man lagi ang imong pagmata karong buntaga?"

¹⁰³ "Oh," ingon niya, "palangga, nahunahunaan ko lang nga ako, uh, uh. . ." Kabalo namo, mahimong ihatag mo ang tanang klaseng pagpalusot, Zaqueo. "Nahunahuna ko lang man gud nga maanindot siguro kung maglakaw-lakaw ako didto sa gawas ug mohanggab og—mohanggab og presko nga hangin. Kabalo ka na, medyo og. . ." Magpustora ba diay siya para lang sa usa ka butang nga ingon niana, kabalo namo? Ug nahibalo gyud si Rebekah sa hinungdan kung ngano.

¹⁰⁴ Busa ania na migawas na si Zaqueo, milingi pa sa balay, kabalo namo, samtang pagawas na siya padulong sa dalan, mitan-aw sa luyo. Si Rebekah nagasil-ip didto sa gawang, kabalo namo, ginasil-ip para makita kung unsa ang ginabuhay sa iyang bana. Dinha pa lang nasayran na niya. Miluhod siya, og miingon, "Salamat, Ginoo. Nagatoo ko nga natubag na gyud. Napalihok na gyud nato siya."

¹⁰⁵ Busa kung naiampo mo ang imong Zaqueo nga motambong dinhi sa panagtigum niining buntaga, molihok gyud siya.

Siguro nagalingkod na siya dinhi karon, mao nga aduna gyuy pagpanglihok sa iya. Napalihok na nato siya hangtud nianang puntoha, bisan pa man.

¹⁰⁶ Busa migawas na si Zaqueo, nga nagalingi-lingi sa luyo, sa pagsiguro kung aduna ba’y tawong nagalantaw kaniya, kabalo na mo. Miingon siya, “Karon, kabalo ba mo kung unsay akong buhaton?” Sige adto kita sa ginahunahuna ni Zaqueo niadtong tungora. “Napatoo gyud ang akong asawa niining, gitawag nila nga, Propetang taga-Galilea; sa dihang, ang akong—akong saserdote ug pastor nagsulti nako, ‘Wala na’y ingon nianang butang sa niining panahona. Ang tanan niining mga milagro ug ingon-anang mga butang medyo pagpang-ilad na lang kana. Wala kana’y pulos.’ Kabalo ba mo kung unsay akong buhaton? Mag-adto ako didto ug sultihan ko gyud Siya kung unsa’y tanaw ko Kaniya. Hinungdan nga, mamahimo akong dungganong lalaki sa niining siyudad, nakita n’yo, kung masultihan ko na Siya, mismo sa Iyang atubangan. Kana ang pagabuhaton ko.” Busa miadto na siya.

¹⁰⁷ Miingon, “Karon didto si Jesus sa habagatang bahin mosulod, dili, o gikan diay sa amihanang bahin, pasulod sa Jerusalem, Siya, gikan sa Dan paingon sa Beer-sheba, ang panaw.” Miingon pa, “Akong—akong—akong... Moadto man Siya sa Jerusalem, busa ako—didto ako sa norte nga ganghaan. Tagboon ko Siya mismo sa pagsulod Niya. Ug didto ako magtindog ug masud-ong ko Siya didto ug ayo, ug isulti ko mismo Kaniya kung unsay akong hunahuna.”

¹⁰⁸ Oh, unsa na kaha kadaghang Zaqueo ang aduna niining panahona, paghisgotan ang mahitungod kang Jesus diha sa panagtigum, “Pundok ra kana sa mga holy-roller. Wala kana’y pulos. Kung makita ko lang kanang Tawhana, mao gyud kana’y buhaton ko!” Kita n’yo?

¹⁰⁹ Busa miadto na siya didto sa ganghaan. Pero ang makahibulongang butang, kabalo mo... Plano niya nga mopuwesto siya sa pinakamaanindot nga puwesto didto mismo sa ganghaan, dayon sultihan Siya nga usa siya ka negosyante; nga miyembro siya sa—sa Kiwanis, siya—nga miyembro siya sa mga asosasyon ug—ug tanan nga—nga kapunongan sa siyudad. Nga siya, siya’y—siya’y usa sa mga opisyaales didto, nga dungganon gyud siya ug ginarespeto. Usa siya ka desenteng lungsuranon. Ug gusto gyud niyang isulti Kaniya nga dili na Siya kinahanglan pa nga moanha sa lungsod, kay daghan na kaayo silang mga magwawali ug daghan na nga mga kaiglesiahan, dili na nila kinahanglan ang Iyang ideya didtong lugara. Busa dalidali na siyang milakaw didto sa dalan, ug nga nakalabuntod ang iyang dughan, kabalo na mo. Ug, oh, grabe! Ngano man? Aba, himoon gyud siya nga diyakono sa rabbi kung buhaton nila ang usa ka butang nga sama niana. Busa miadto na siya didto sa ganghaan.

¹¹⁰ Pero ang pagkatalagsaon niini. Bueno, kabalo na mo, medyo salikwaut, tungod, sa matag lugar nga—nga maadtoan ni Jesus, kasagaran aduna gyu’y mga tawo didto nga nanagpatalinghug Kaniya. Kita n’yo? Ug sa wala pa si Zaqueo makaabot didto, iyang—iyang nadungog ang paghugyaw. Ug nanag—awit ang mga tawo didto og tanan nang klase sa mga alawiton, ug—ug, “Himaya sa Dios sa Kahitas-an,” ug tanan niining maanindot nga mga himno nga ilang ginakanta, ug ang uban nanagsiyagit ug nanagsinggit. Dili ba talagsaon nga, diin gani si Jesus, aduna gyu’y mga paghugyaw? [Nagaingon ang kongregasyon, “Amen.”—Ed.] Kita n’yo? Daw sa . . .

¹¹¹ Kabalo na mo, misulod Siya sa templo ug . . . usa niana ka adlaw, didto, sa Jerusalem, diay, ug niadtong pagsulod na Niya, nanagputol sila og mga palmera, ug nanagsiyagit. Ug didto pud nanagtindog sila, kadtong bantog nga mga propesor sa katilingban ug mga ingon-ana, ug mga saserdote, ug nanagingon, “Pahilumon Mo sila.”

¹¹² Miingon Siya, “Kung pahilumon sila, ang mga bato ang magsituaw sa dihadhiha.” Kita n’yo, aduna gyu’y pagtuaw kung asa Siya. Husto kana.

¹¹³ Kabalo namo, sa dihang misulod si Aaron niadtong Shekinah, sa atubangan sa Shekinah, kinahanglan nga dinihogan siya, ug kinahanglan nga siya . . . ang iyang mga bistì kinahanglan adunay nagbitay’ng prutas nga granada ug campanilla. Ug mao lamang kadto ang paagi nga mahibaloan nila nga si Aaron buhi pa sa gihapon samtang atua sa sulod, sa dihang madungog nila ang pagbagting-bating niini. Ug napamalandongan ko nga mao lamang kana ang paagi para mahibaloan sa Dios kung kita ba’y buhi pa o dili na, kung may madungog kamo nga pagtingog-tingog. Sa ingon niana ninyo mahibaloan ang patay, nga adunay nahitabo niini. Busa kinahanglan masulti nila kung buhi pa ba siya o wala na, pinaagi mismo niadtong pagtingog-tingog.

¹¹⁴ Busa nadungog ni Zaqueo ang tanang mga paghugyaw didto. Ug sa pag-abot na niya didto, puno na kaayo ang ganghaan, ug nanagkatkat na sila sa mga pader, ug tanan na. Ug mubo man kaayo siya nga tawo, kung hunahunaon, busa nahunahuna niya, “Unsaon ko man sa pagkakita Niya? Siguradong daghan kaayo nga mga holy-roller ang nakapalibot Kaniya, nga dili ko—dili ko Siya makita. Busa kabalo mo,” miingon siya, “Kabalo na ko, dili gyud nako Siya makita dinhi, tungod kay mubo man kaayo ko.

¹¹⁵ “Pero nahibalo ko nga mag-adto man Siya didto sa akong kompetensya sa negosyo nga—nga didto Siya maniudto. Busa dili ko man gud makita, kung tinuod gyud nga Siya Tawong labaw sa bisan unsang salabutan, nan didto Siya moadto sa akong lugar nga negosyo, sa akong restawran. Pero didto man gud Siya moadto kang Lavinski.” O, nanghinaut ko nga wala unta dinhi

og Lavinski. “Busa dayon, bisan pa man, siguradong didto gyud Siya moadto sa iyang restawran. Ug, sa tinuod lang, mas lamian man ang ginabayang ko nga pagkaon, ug—ug ngano man nga ang maong Tawo bisan pa nga . . . ug si Rebekah nga miyembro pa gani sa Iyang iglesia, ug didto gihapon Siya nga restawran nga ingon niana moadto?”

116 Bueno, miingon siya, “Kabalo na ko, moadto diay ko didto sa nagkakrusan nga dalan sa Hallelujah Avenue ug kalyeng Himaya. Siguradong moagi gyud Siya nianang dalana.” Tinuod kana. “Mismo didto, sa maong kalye sa siyudad, kon diin nagkakrus ang dalan sa Hallelujah Avenue ug Himaya.” Kanunay ninyo Siya makaplagan mismo nianang lugara.

117 Busa mibiya siya niadtong nagdasok nga mga tawo ug dalidali nga midalagan padulong didto, ug sa hunahuna niya niadtong higayona, ania maayo ang pagkapostura niya, ug miingon, “Karon pag moagi Siya didto sa kanto, sultihan gyud nako Siya, isulti nako sa Iya ang akong opinyon. Moagi gyud Siya niining dalana, busa akong—akong—akong . . . pag moagi na Siya.” Dayon kalit niyang nahunahuna, “Kabalo mo, bisan mosunod pa Kaniya ang kadaghanan.”

118 Kanunay silang nagasunod Kaniya. “Kung asa gani ang bag-ong gipatay’ng lawas, ang mga agila magakatapok.” Dili ang mga manok, ang langgam nga pangyuta lang. Kadto rang agila nga panglangit ang magkatapok sa bag-ong gipatay’ng lawas. Ang manok mao’y ig-agaw lang niya, kabalo na mo, nagatunob lang sa yuta ang manok kon diin ang mga ilaga ug tanang uban pa puede siyang kaonon. Pero ginapahiluna sa agila ang iyang salag didto sa pinakaibabaw sa kahoy, nga wala ni kinsa man ang makaabot niini. Dili sila masamok sa mga insekto; habog ang ilang lupad. Karon, ang mga gapanukob ug mga ilaga ug uban pang mga butang dili kanila makasamok, usa man gud siya ka agila. Ang gusto lamang nila mao’y Pagkaon sa agila. *Mao na Kini.*

119 Kabalo mo, si Jehovah usa ka agila, Mismo, ug ang tawag Niya sa ato mao’y mga gagmay’ng agila. Ang Iyang mga propeta mao’y mga agila, mga manalagna.

120 Ang agila nagalupad sa pinakahabog, wala na’y ubang langgam nga makahimo sa pagsunod kaniya. Aba, kung mosulay ang uwak sa pagsunod kaniya, mabungkag gayud siya. Husto kana. Ingon niana ang problema sa panahon karon, daghan kaayo ang naninguhang magsundog-sundog. Sa dili madugay pud mabulgar kini. Molupad ka man nga mas habog pa, ang tanan sa balahibo mo mangatangtang. Um-hum, um-hum, uh-huh. Husto. Mangatagak sila sa yuta. Hinumdumi, kinahanglan nga usa siya ka hinimong-espesyal nga langgam. Ug ang tawo nga mosunod niining Pulong kinahanglan nga espesyal ang pagkahimo, hinimo sa Dios, dili sa seminaryo. Mao nga makita

nato kung siya . . . kung siya mopahitaas pa sa paglupad, kung dili kayahon sa iyang mga balahibo, unsa mang kaayohan ang maihatag niini ngadto kaniya.

¹²¹ Ug ang usa pa ka butang, sa dihang nakalupad siya paingon sa itaas, unsa kaha kung atua na siya didto ug dili na siya makakita pagdidto na ug wala siya’y makita og bisan unsa man? Kita n’yo, kinahanglan makakita gihapon siya (kita n’yo?), aron mahibal-an niya kung unsay ginabuhat niya pagdidto na siya sa itaas. Busa ingon niana ang mga agila sa Dios. Pagmolupad ka nga mas habog pa, mas halayo ang makita nimo, nga sa pagbalik mo ug mapridiktar mo kung unsa mismo ang butang nga andam nang mahitabo. Nasabtan ba ninyo? [Nagaingon ang kongregasyon, “Amen.”—Ed.] Siguro nasabtan kana og ayo sa itum nga igsoon nga anaa diha sa luyo niining buntaga, kita n’yo. Karon matikdi.

¹²² Dayon makita nato kadtong gisulti niya, “Kung magtindog pud ko dinhi, tungod nianang panon nga nanaghugyaw, dili Niya madungog ang akong isulti. Wala ma’y hunong ang ilang pagsinggit ug paghugyaw, mamahimong walay pulos ang akong pagsaway Kaniya.” Maayo. Busa miingon siya, “Pero kabalo ba mo kung unsa ang maayong buhaton ko? Sultihan ta mo kung unsa ang buhaton ko. Aduna ma’y kahoy’ng sicomoro didto. Ug mosaka ako nianang kahoy’ng sicomoro, ug sa dihang moagi na Siya, makita ko mismo Siya. Dayon magpakita ako didto ibabaw sa usa sa mga sanga didto, ug sultihan nako Siya kung unsa ang angay kong isulti Kaniya. Ug maila Niya nga ako si Zaqueo, nga miyembro sa maanindot nga denominasyon niining lugara. Isulti nako sa Iya kung asa ako miyembro ug kung unsa ang opinyon sa akong saserdote mahitungod Kaniya.” Bueno, ingon niadto ang nahunahuna niya nga maayong plano.

¹²³ Milantaw-lantaw siya sa palibot, ug nahunahuna niya, “Karon, ang sunod nga butang, mao ang unang sanga anaa sa mga—mga napulo ka pye ang kataas.” Ug anaa lamang siya sa mga upat ka pye kataas, mao nga unsaon man niya sa pagsaka ang sobra nga unom ka pye? Kita n’yo? Busa naghunahuna siya kung sa unsang paagi niya nga masaka kadto. Wala gyu’y ubang paagi para makatungtong siya didto, ug kinahanglan gyud niya nga masaka kadtong kahoy. Busa milantaw-lantaw siya sa tibukok palibot, ug wala gyu’y bisan unsa didto gawas lang sa . . . Kabalo na mo, wala pa nakaagi ang basurero niadtong buntaga, ug ang mga butanganan sa basura atua pa sa daplin. Nahunahuna niya, “Kung maibalhin ko lang unta kanang basurahan dinhi, siguro mahimo na nakong . . . insakto na siguro nga makatungtong ako para makasaka didto ug makapanggunit nianang unang sanga. Tungod nga determinado man gud ko nga makita Siya. Makita ko na gyud Siya.”

¹²⁴ Kabalo mo, aduna gyuy sa kung unsang butang bahin niini, pag nagatinguha gyud ang usa ka tawo nga makita si Jesus,

nagaagi siya sa pinaka-radikal nga mga butang. Kita n'yo? Pero, nakita n'yo, nagapakigharong na diay ang Dios diha kaniya. Unsa ma'y hinungdan niini? Ang mga pag-ampo kini ni Rebekah nga ginatubag na, kita n'yo.

¹²⁵ Bueno, miadto siya didto. Ug wala pa miagi ang basurero niadtong buntaga, ug bug-at kaayo kadtong butanganan og basura, busa dili niya maalsa kini. Labot pa niana mubo ra kaayo siya. Busa gipankingamotan gihapon niya, ug dili niya maalsa. Aduna og usa lamang ka paagi para maalsa niya, mao'y sakwaton niya kadto gamit ang iyang lawas og bukton, para maalsa. Pero sul-ob man gud niya niadto ang pinakamaanindot niyang bisti.

¹²⁶ Pero aduna gyu'y sa kung unsang butang mahitungod niini, pag gusto mo gayud nga makita si Jesus, buhaton nimo ang tanang butang. Kita n'yo? Imong—imong buhaton ang tanang butang, kung gusto mo gayud Siyang makita. Busa miadto siya didto ug iyang. . . Kita n'yo, sulayan gyud ni Satanas nga pugngan ka nga mahimo kana, usab. Ang tanan-tanan, ibabag gyud niya. . . Magbutang mismo siya og mga babag sa dalan, sa tanang panahon, aron pugngan ka nga makita Siya. Butahan niya ang imong mga mata sa unsa mang butang nga mahimo niya. Pero kung determinado gyud ka, ang Dios mangita og paagi para sa imo. Nagaagi Siya mismo niining dalan karong buntaga, usab. Ayaw pasagdi si Satanas nga magbutang og unsa mang babag sa imong dalan, sama sa imong “oras, ug ingon *niini*, ug kinahanglan nga buhaton ko usá *kini*.” Magpuyo lang sá ka diha sa imong lingkoranan nga hilum.

¹²⁷ Busa ania na siya nga mipadulong didto, nakadungo, nga sul-ob kadtong nindot niyang bisti. Sigurado gyud nga mabulingan niya og ayo ang iyang kaugalingon. Gisakwat na niya kadtong basurahan. Niadto mismong tungora pagkasakwat niya niadtong basurahan ug andam na unta niyang dalhon, ania miabot didto ang iyang kakompetensya sa negosyo.

¹²⁸ Ingon niana pud kini, Zaqueo. Miingon ka nga dili gyud ka mokuyog niining pundok sa mga holy-roller, pero ania ka mismo karon.

¹²⁹ Bueno, ania na siya nga nagpahiluna didto, nagatindog nga dala-dala kadtong basurahan, ang iyang—namula ang iyang nawong. Bueno, ang kakompetensya niya miingon, “Hala, tan-awa n'yo, si Zaqueo, ang tag-iya sa restawran dinhi, nagbag-o na siguro sa iyang trabaho. Aduna na siya og bag-ong posisyon. Bueno, kabalo mo, siya usa na ka—siya usa na ka. . . nagtrabaho na para sa siyudad, ingon nga usa ka basurero.” Bueno, aduna gyuy sa kung unsang butang mahitungod niini, bisan pa niana, kung determinado gyud ka nga makita si Jesus, buhaton mo mismo ang tanang butang. Nagpadayon lang siya, ug bisan namula ang iyang nawong, bisan namaga ang iyang nawong. Ug

atua siya, nga gidala kadto ug giplastar didto. Mitan-aw siya sa palibot, wala niya panumbalinga sila nga miliko na didto sa kanto.

¹³⁰ Dayon mitungtong siya niadtong basurahan, ug dalidali nga mikapyot sa kahoy. Uh-oh, pasensya na, dili diay unta kana ang isulti ko. Mikapyot, kabalo namo, kadto—kadto ang. . . Pila man sa inyo ang nakahibalo kung unsa ang buot ipasabot sa “mikapyot sa kahoy”? Bueno, sige okay ra man. Kita n’yo, sa ato pa, mikatkat siya sa kahoy.

¹³¹ Ug misaka na siya didto, ug atua na siya, nga nagalingkod didto. Paghisgotan na gani ang kahugaw! Nagkabulingit siya mismo og basura, pagkahugaw niyang tan-awon.

¹³² Ug, usahay, pahanugotan sa Dios nga magkaingon-ana ka. Amen. Aduna ko’y nadungog karong adlaw, kabalo ba mo sa bag-o nilang pamaagi? Hinaut unta nga dili kana makasulod sa atong Pentecostal nga katilingban, bisan pa nga nakita nako nga hinay-hinay na kining nakasulod; nga motambong, makiglamano, “Akong—dawaton nako si Jesus ingon nga akong personal nga Manluluwas.” Ang gusto nako nga makita silang magluhod didto sa altar, ug mamatay, nga dunay pagpangdukdok, ug magbakho, ug motulo ang laway tungod sa paghilak. Ug, kabalo na mo, sa dihang imong. . . Aduna kami kaniadto og binuhi nga mga kabayo, ug sa higayon nga pakanon namo sila og clover, kanang puro, matam-is nga clover, nga may dugos, magpalaway kadto sa mga kabayo. Sa dihang paduol nga paduol na kamo sa Canaan, maglaway gyud kamo, usab, kabalo na mo, tungod sa pagkaon nianang Dugos nga naggikan sa Canaan.

¹³³ Busa ania na makita nato siya, nga atua na karon ibabaw niadtong kahoy, nga ginatangtang ang basura nga mingtapot sa iyang bag-ong. . . Wala gyud siya magdahum nga mabuhat niya kadto. Tugoti ra nga adunay mag-ampo para kanimo, makabuhat gyud ka og talagsaong butang. Ug gipangtangtang niya kadto nga ingon *niini*; ug may salugsog pa sa tibuok niyang mga tuhod ug sa tibuok niyang mga kamot, nga nagalingkod didto nga ginapangtangtang ang mga niini. Miingon siya, “Bueno, karon, nahugawan na hinoon ko! Nga nakalingkod pa gyud dinhi.” Miingon pa, “Kabalo mo, ang giingon man gud ni Rebekah nga Propeta kono kining tawhana. Karon, ako—maghulat lang ko, magtago sá ko.” Busa milingkod siya kon diin dihay duha ka nagtagbo nga sanga, daw sa maanindot nga dapit kadto para malingkoran.

¹³⁴ Ug human nga ingon na niana ka halayo ang imong naabot, ug ingon na niana usab ang imong naabot karong buntaga, Zaqueo, nga naglingkod kamo, usab, diha kon diin nagtagbo ang duha ka dalan, ang imo ug ang iya sa Dios. Kita n’yo? Sa diha nga imong gipadaplin ang imong kaugalingon og ayo aron makaanhi

dinhi karong buntaga, bueno, ang mga pag-ampo ni Rebekah mamatubag na. Pero ania ka nagalingkod sa ginatagboan sa duha ka dalan karon, ang dalan nimo og ang sa Dios. Kita n'yo?

¹³⁵ Ug naglingkod siya didto, ug naghunahuna siya, “Ang ingon sa akong asawa, ‘Usa Siya ka propeta.’ Ang tanan na niining mga butang, ‘Mahimo Niyang hibaloan ang mga hunahuna sa mga kasingkasing sa mga tawo, ug ibutyag kini ngadto kanila, ug isulti kanila kung unsa ang problema nga anaa kanila.’ Ug, oh, kining mahitungod usab kang ‘Natanael, nga pag-abot niya gisultihan siya nga atua siya kaniadto ilalum sa kahoy.’ Kabalo na mo, dili ko gayud sayangon ang maong kahigayonan. Tabonan nako ang akong kaugalingon, dinhi ibabaw sa kahoy. Mahitabo gyud nga ania ako sa kahoy, usab. Ug busa di ko man gyud matoohan nga usa Siya ka propeta, bisan pa. Dili ko gyud matoohan, tungod gisulti man kanako sa akong mga saserdote nga wala na og ingon nianang mga propeta kono. Wala na man gani kami og mga ingon niana sulod sa mga gatusan ka tuig.”

¹³⁶ Busa karon, siyempre, masabtan ninyo nga ginadrama lang nako kini dinhi, para maghatag og punto.

¹³⁷ Busa gipungpong niya ang tanang niadtong mga sanga ug gibira niya kini palibot kaniya, aron matabonan siya niini, para maitago og ayo ang iyang kaugalingon. Miingon, “Karon pagmoagi na Siya diha sa Hallelujah Avenue, gikan sa Hallelujah, moliko ngadto sa Himaya. Busa dinhi mismo sa kanto, pagmoagi na Siya nianang dalana, pagmoliko na Siya sa kanto, magbilin na lang ko og usa ka dakung dahon dinhi, para makasil-ip ko ug makita Siya. Isalimbong lang nako. Dili gyud Niya ako makita, sa ingon niini ka habog. Ug dayon sa pag-agi Niya, ug tan-awon nako Siya og ayo, kabalo ba mo kung unsa ang akong buhaton? Iwahing ko kining mga sanga, ug human nga makaagi Siya dinhi, ug isulti gyud nako Kaniya ang akong opinyon. Isulti gyud nako kini Kaniya.” Busa milingkod siya didto sa makadiyut.

¹³⁸ Pagkataudtaud nakadungog na siya og mga paghugyaw nga nagapaduol. Kasagaran nagaabot si Jesus kauban ang ingon nianang mga paghugyaw. Busa ania na Siya nga miabot sa kanto. Busa, si Zaqueo, unsa ang una niyang nakita? Usa ka pundok sa mga tawo nga nagatigum sa mga dalan. Miingon siya, “Maayo nalang nga ania ako sa ibabaw niining kahoy, para dili ako masagol kanila pag-usab.” Busa atua siya ibabaw sa kahoy, nagalingkod didto, nga nakatago gyud, para walay makaila kaniya, bisan ang iyang mga kakompetensya wala mahibalo nga atua siya ibabaw sa kahoy niadtong tungora. Mao nga aduna siya’y usa ka dahon didto nga ginawahing ug para makatan-aw, ug itabon kini pag-usab, pero ang tanang uban pa nga bahin sa iyang lawas nakatago gayud. Busa gipataas niya ang kadtong dahon, ug makita niya nga ang mga tawo nagatigum-tigum didto sa mga kanto.

¹³⁹ Ug, kabalo mo, miabot didto si Mr. Jones nga dala ang anak niya nga adunay sakit. Ug nadungog na niya ang—ang saserdote ug ang doktor, didto mismo sa iyang kaugalingong restawran, nga gihisgotan nila ang maong butang sa miaging adlaw, nga, “Kana nga bata naghimalatyon na, adunay hilanat nga dili mapalurang sa doktor, ug wala gyu’y makapalurang niini. Ug kana nga bata gidid-an na nga ipagawas sa balay. Pero ania, siya,” ang mismo niyang kustomer, “nahimo na nga ingon ka panatiko nga ila gihapon gidala pagawas kana nga bata didto sa matugnaw nga hangin sa Marso. Ug ania siya nga gibukotan nila og habol, usa ka gamay’ng babaye nga mga diyes anyos ang panuigon. Grabe ka panatiko! Kung moadto siya utro sa akong restawran, patay na nianang tungora ang bata, siguro gyud; sultihan nako siya, isulti ko gyud sa iya ang akong opinyon!”

¹⁴⁰ Pagkataudtaud mikusog nga mikusog ang mga paghugyaw, ug tanan sila nanggidagan padulong sa dalan. Ang unang miabot didto sa kanto sa Hallelujah Avenue, nga paingon sa kanto sa Himaya; niadtong paliko na sila niadtong dalan, makita nato, mao ang usa ka daku ug maskulado ang lawas nga mangingisda nga upaw na, nga ginganlan og Simon, nga nagaingon, “Mahimo ba nga magpadaplin kamo, mga igsoon?” Ania pud nagsunod ang onse sa luyo niya, nga nagaingon, “Kung mahimo lang, palihog, padaplin mo sa dalan. Ang Agalon namo nagpahigayon og taas-taas nga panerbesyo kagabii, ug—ug nakabsan Siya og kusog, ug dagkung mga panan-awon ang nahanabo. Ug gikapoy gyud Siya karong buntaga, ug Siya—Siya—mamahaw na Siya. Mahimo ba nga mopadaplin uná kamo, palihog lang?”

¹⁴¹ Ug ania na ang pamilyang Jones nga miadto didto, dala kadtong bata. Ug ang dakung mangingisda ug ang uban kanila, miingon, “Padaplin usá, mahimo ba, palihog lang.” “Bueno, gidala namo ang bata dinhi nga kung dili mahatagan og pagtagad mamatay gyud siya. Misurender na ang mga doktor niini. Mahimo ba ninyong katugotan kami nga bisan mapandungang lamang ang bata . . .”

¹⁴² “Pasensya na. Ang tanan nga mga tawo dinhi gusto pud niana, busa ako—dili ko matugotan kana. Maayo pa nga mosibog na lang mo, mopadaplin. Moagi na Siya mismo karon. Mahimo ba nga mopadaplin mo?”

¹⁴³ Busa makita ko, ingon nga sama sa usa ka magbalantay, gikan sa hataas nga lugar nga nahimutangan niya, didto sa kahoy, nga nagapaniid, ug nakita ni Zaqueo sila Mr. Jones ug Mrs. Jones nga miluhod na mismo, didto sa bagang panon, nga nagaingon, “Ginoong Dios, ayaw ako’g labyi. Oh maloloy-on nga Manluluwas, dungga ang mapainubsanon kong pagtuaw. Samtang nga nagapanawag Ka sa uban, ayaw ako pagalabyi.”

144 Ug pag-agi ni Jesus didto, mihunong Siya, ug miingon, “Mr. Jones, mahimo bang dalhon mo dinhi ang imong anak?” Usa kadto ka makapahaylo mismo nga eksena.

145 Ingon niana gihapon si Jesus sa karon. Wala na’y kinahanglan nga prayer kard. Wala na’y kinahanglan kung unsa ka nga grupo. Pagtoo ang gikinahanglan, sama kaniadto kang Bartimeo nga buta didto sa pikas nga tumoy sa ganghaan niadtong paggawas ni Jesus. Duha ka gatus ka yarda ang gilayon gikan Kaniya, ingon niadto ang distansiya, og giunsa man Niya pagkadungog sa tingog ni Bartimeo? Pero, “Oh Jesus, Anak ni David,” napahunong gyud Siya niadto, nahikap ang Iyang bisti. Ug mao nga milingi Siya, miingon, “Dad-a siya dinhi.” Kita n’yo?

146 Ug gidala nila ang gamay’ng bata didto. Gipandangan ni Jesus sa Iyang mga kamot ang gamay’ng bata, kadto lang ang gibuhat Niya. Sa pipila lang ka gutlo, gidala na kini pauli sa amahan, ug atua ang bata sa dalan nga nagadagan, pauli. Nawala na ang iyang hilanat.

147 Medyo natandog siya niadto. Miingon siya, “Tinuod gyud siguro Siya nga propeta?” Medyo naghatag kadto kaniya nga motoo.

148 Kabalo mo, adunay ingon nianang mga butang nga nagakumbinser kanato, tungod nga Siya mao ang Pulong, (dili nga “Ako kaniadto”), “AKO MAO.”

149 Ug sa dihang paagi na si Jesus ilalum sa kahoy, nahunahuna niya . . . Bueno, giwahing niya ang gamay’ng dahon, og midungaw. Sa dihang didto na si Jesus ilalum sa kahoy, nahunahuna niya, “Usa gyud kaha Siya ka propeta? Tinuod siguro.” Nakita n’yo, kinahanglan magkaaduna mo og pagtoo. “Propeta gyud kaha Siya?” Ug sa paglabay ni Jesus ilalum sa kahoy, nga nakadungo ang Iyang ulo, nga nagalakaw sa kalmado Niyang pamaagi.

150 Aduna gyu’y sa kung unsang butang, pagmakita mo Siya, kamo—kamo—mausab gyud kamo. Dili mahimong mao ra kamo sa gihapon. Nadungog na nako ang mahitungod Kaniya, nadungog na pud ninyo ang mahitungod Kaniya; pero sa dihang nakita ko mismo Siya, ang Iyang Pulong, ako—ako—dili mahimong mao ra ako sa gihapon. Aduna gyu’y sa kung unsang butang diha Kaniya, nga lahi kumpara sa uban pa nga tawo. Aduna gyu’y sa kung unsang butang diha Kaniya, nga lahi kumpara sa mga obispo ug mga kardinal ug mga santo papa, ug uban pa. Siya, aduna gyu’y sa kung unsang butang diha Kaniya nga lahi.

151 Natandog gyud ang mubo nga si Zaqueo. Ang mga pag-ampo ni Rebekah nahatagan mismo og tubag. Sa pag-agi Niya ilalum sa kahoy, miingon, “Bueno, ako—siguro mangayo na lang ko og pasaylo kang Rebekah pagnakapauli nako. Mora Siya’g

padulong Siya ngadto kang Lavinski, okey lang. Kung mokaon man Siya karon sa uban nga restawran, okey lang man sa ako.” Kita n’yo, sa tapos na niyang nakita Siya.

¹⁵² Busa sa dihang atua na Siya mismo ilalum sa kahoy, mihunong Siya, og mihangad, miingon, “Zaqueo, kanaug ngari. Mokuyog Ako sa imong pagpauli, para makapanihapon karon sa inyo.” Kita n’yo, nahibaloan Niya nga atua si Zaqueo didto sa itaas. Nahibaloan pud Niya kung kinsa siya.

¹⁵³ Igsoong lalaki, igsoong babaye, Siya mao sa gihapon kagahapon, karon, ug hangtud sa kahangturan. Moagi gyud Siya niining dalana niining buntaga. Miagi na Siya niining dalana tibuok niining siyudad, tibuok nang semana nga nakauban nato dinhi.

¹⁵⁴ Kabalo ba mo kung unsa? Pagmoanhi ang Presidente, si Presidenteng Johnson dinhi sa Topeka, igataas gayud ang mga bandera, siguradong pagadayandayanan ang mga kadalanan, ug dawaton gyud siya sa mainiton nga pag-abi-abi. Pero kung si Jesus ang moanhi, halos wala man lang tawo nga moanha ug para tagboon Siya. Siguradong adunay mga pulis nga mag-escort sa pagbiyahe sa Presidente dinhi sa siyudad, pero kita dinhi karon daghan kaayong bakanteng lingkoranan. Nakita n’yo ang kalainan? Wala na’y pagpakabana ang mga tawo nga makita Siya.

¹⁵⁵ Nagalaum ako nga adunay Zaqueo dinhi niining buntaga. Ug sa pag-agi karon ni Jesus niining dalana, Siya mismo kana nga nagapakig-estorya sa imo.

¹⁵⁶ Mikanaug si Zaqueo sa kahoy. Siyempre, moingon gyud ang mga kritiko, “Usa man ka makasasala kining tawhana.”

¹⁵⁷ Miingon kini, “Ginoo, kung aduna man ko’y gikuha pinaagi sa pagpanglimbong, igabalik ko kana sa gatus ka pilo. Ibalik ko gyud kana. Ug kung aduna man ko’y tawong gilimbongan, andam ako nga ihusto kana sa gilayon. Ako—andam ako.”

Iduko nato ang atong mga ulo.

¹⁵⁸ Mga Zaqueo, andam na ba kamo karong buntaga? Nganong dili na lang kamo monaug gikan sa kahoy? Nganong dili na mo molihok? Moagi Siya niining dalana karon, moagi sa inyong kasingkasing, magapakigsulti sa inyo. Aduna ba, samtang ginaduko ninyo ang inyong ulo, nga nagaampo, aduna ba dinhi nga magsulti, “Igsoong Branham, sa tinuod lang aduna ko og gamay’ng pagduda”? Hinumdumi, usa siya ka relihiyosong lalaki, mismo. “Aduna ko og gamay’ng pagduda, pero karon nagatoo na ako. Tabangi ang akong dili-pagtoo, Ginoo.” Dili kang Igsoong Branham, tungod nga wala ma’y ubang nakakita gawas lamang sa akong kaugalingon ug sa Dios, “busa ipataas ko ang akong kamot ug moingon, ‘Ayaw ako’g labyi, Oh maloloyon nga Manluluwas. Dungga ang mapainubsanon kong pagtuaw. Himoa akong tinuod nga magtotoo, Ginoo. Tana, uban kanako

sa pagpauli ug magpabilin sa akong panimalay.’ ‘Karong adlaw magpabilin Ako sa imong panimalay.’”

¹⁵⁹ Mahimo ba ninyong ipataas ang inyong kamot, moingon, “Hinumdumi ako, Dios”? Ang Ginoo magapanalangin kanimo, panalangin ka, ug ikaw. “Hinumdumi ako, Dios. Uban kanako sa pagpauli, niining buntaga. Nahibalo ko nga ania Ka. Nahibalo ko nga nasayod Ka sa akong kasingkasing. Nagapamulong Ka kanako karon. Nahibaloan Mo ang mga butang nga nabuhat ko nga sayup. Nahibaloan Mo bisan miyembro ako sa full Gospel nga iglesia, pero sa gihapon nagpasagad ako, wala nako buhata kung unsa ang husto. Wala ako nagatambong sa mga panagtigum sa pag-ampo. Mas giuna ko pa ang uban nga . . . Nabuhat nako ang mga butang, nga sa tinuod lang, dili subay kung unsa ang among—among ginatoohan.”

¹⁶⁰ “Ako—ako—usa ako ka babaye, ug naamgo ko nga sayup ang akong binistihan. Ug ginaputlan ko ang akong buhok. Nagmekap ako. Ug usa man unta ko ka full Gospel nga babaye, igsoong babaye. Kaloy-i ako, Ginoo. Akong—gusto nako nga mouban Ikaw kanako sa pagpauli karon, ug ako—ako—ako magkinabuhi ingon nga usa—usa ka buhi nga ehemplo ni Cristo, sugod karon.” Mabati ba ninyo kana nga Presensiya sa Dios, sige ipataas n’yo ang inyong kamot, ug moingon, “Iampo ako.” Ang Dios magapanalangin kanimo, ug ang Dios magapanalangin kanimo, kanimo. Panalangin kamo sa Dios, mga igsoong babaye. Oo.

¹⁶¹ Langitnong Amahan, ang pipila sa niining mga babayeng Zaqueo ug mga lalaking Zaqueo nanagwahing sa ilang dahon ug midungaw. Naamgo nila nga hingkaplagan ni Jesus kon diin sila nagpuyo ug kung asa na sila, og napadayag kanila nga nangasayup sila. Daghan, daghang mga kamot ang nagpataas. Hinaut nga mouban Ka kanila sa pagpauli nila karong adlaw, Amahan, nga adtoan Mo ang ilang mga panimalay, magpuyo sulod sa ilang mga kasingkasing. Hinaut nga dili nila mahikalimtan kining buntaga. Bisan pa, sa niining . . . makahimuot nga mga butang nga akong . . . ug naningkamot lang nga makamugna og—og—og pagbati nga makapahimuot sa niining nagkasagol nga mga tawo. Ug karon sa niining higayon nga ang punto natumbok na mismo, nga kini diay—kini diay para—para maamgo sa mga tawo kung unsa ang ania uban kanamo dinhi karon buntaga, ang Pulong nga nadayag dinhi sa among siyudad, sa among taliwali, ang Ginoong Jesus diay Mismo, ang Pulong nga nahimong unod, nga nagapamuhat Mismo pinaagi sa usa ka tawo. Oh Dios, hinaut nga makita kini sa minahal namong mga higala ug aron nga mas mapahiduol pa sila Kanimo.

¹⁶² Ubani sila sa ilang pagpauli, ginapangamuyo ko kana pag-usab, Amahan, nga ubanan Mo ang matag Zaqueo ug ang matag babaye, ang matag Rebekah. Hinaut nga hingbaloan niya nga ang mga gipangamuyo niya natubag na. Ginatugyan

namo sila sa Imo karon. Ug hinaut nga sila, sa walay pagpanuko, dawaton Ka mismo sa ilang mga kasingkasing, sama sa gibuhat niadtong mubong Hebreohanon niadtong buntaga, bisan nasayup sila. Miingon, “Dili ba nga siya man usab, anak pud ni Abraham?” Busa nakaandam Ka gayud nga mouban kanato sa among pagpauli, Amahan. Nagaampo kami nga dili Mo kami pagabiyaan. Ubanan Mo kami, sugod sa pamahaw, samtang nagalingkod kami karong buntaga; ug nagatan-aw sa usa’g usa nga anaa sa pikas nga lamesa, nga malipayon, may pagpakatawa, nagapakiglamano sa usa’g usa, ug nagminahalay sa usa’g usa, nga angay lamang sa kung unsa ang matuod nga mga Cristohanon.

¹⁶³ Ug nahunahuna ko nga ako—ako—basin nga dili na ako makabalik pa pag-usab dinhi. Akong—basin nga dili na nako mahinagbo pag-usab kining pundok nga ingon niini, diha sa usa na usab ka pagpamahaw. Pero nakasiguro ako, Amahan, nga kung itugot lamang nila nga ubanan Mo sila sa pagpauli, karon, ug magpuyo uban kanila, magkitaay gyud kami didto na sa Panihapon, sa diha nga ang mga pagpakigbisog hingpit na nga nadaug ug ang hataas nga lamesa mailatag na sa tibuok silonganan sa langit, ug maglingkod kami ug magkitaay sa usa’g usa atbang sa lamesa.

¹⁶⁴ Ug nagatan-aw ako niining buntaga sa mga ministro nga nagalingkod dinhi, nga mga giuban na ang buhok, nga nagawali na kaniadtong bata pa lang ako. Sa tan-aw ko gipangputol lang nila ang mga nagababag nga mga tuod, gihinloan ang mga dalan, ug gihimong walay sagabal ang pagdagayday niining mga gasa nga gipropesiya na nila kaniadto nga moabot. Dios, panalangini sila, panalangini silang tanan. Panalangini kining buotan nga mga kababayen-an nga nagsakripisyo para ang ilang mga bana aron makapagwali, ug ang mga pagsakripisyo nila nga ginaagihan sa tanang mga Cristohanon. Ubani sila, Amahan.

¹⁶⁵ Magalingkod kami nianang gabhiona, magatan-aw atbang sa lamesa ngadto sa usa’g usa, ug tingali dili na namo makita pag-usab ang usa’g usa human niining buntaga, hangtud nianang panahona. Pero, sa walay pagduhaduha, ang mga luha magadagayday mismo sa among mga aping, tungod sa kalipay, sa dihang itunol ko na ang akong kamot atbang sa lamesa ug aron lamanohon ang ilang mga kamot. Dayon makita namo nga Siya mogawas didto. Ug kami malipay kaayo nga kami mikanaug niadtong kahoy, tingali usa ka kahoy sa kredo, kahoy sa denominasyonhong kredo, o kung unsa, nga kami mingbiya na gikan sa among kahakog, mingbiya na gikan sa among binurong nga mga pamaagi, o sa among kawalay pagtagad Kaniya; nga mingbiya na gikan sa among pagpakabuta, padulong sa Kahayag. Magamalipayon kami nga sa dihang makita na namo nga Siya nga mogawas didto, nga sul-ob ang Panghari Niyang bisti, nga nagalakaw didto sa gilay-on sa lamesa, ug ihikap ang

Iyang bililhong kamot ug pagapahiran ang tanang mga luha gikan sa among mga mata, og magaingon, “Ayaw na paghilak. Tapos na ang tanan. Sumulod kamo sa kalipayan sa Ginoo, nga nahilandam na alang kaninyo sa wala pa ang pagkatukod sa kalibutan.” Hangtud nianang tungora, Amahan, magpapabilin Ka kanamo, ubani kami sa among pagpauli ug magpuyo uban kanamo, hangtud nianang taknaa. Among ginapangamuyo sa Ngalan ni Jesus. Amen.

¹⁶⁶ [Usa ka igsoong babaye ang nagasulti sa ubang pinulongan. Blangko nga bahin sa teyp—Ed.]

I love Him, I love Him
Because He first . . .

¹⁶⁷ Sa dihang misaka ako didto sa kahoy, gihigugma gihapon Niya ako.

And pur- . . .

Tan-awa kung unsa nga kahoy ang gisaka Niya kaniadto para kanako, didto sa Krus, usa ka gitamay nga kahoy.

On Calvary's tree.

¹⁶⁸ Tan-awa kung unsa nga kahoy kadtong gisaka Niya, para ikanaug kamo gikan sa imong kahoy.

I . . .

¹⁶⁹ Karon, dili ninyo Siya mahimong higugmaon kung wala kamo naghigugmaay sa usa'g usa.

I . . .

Karon itunol mo ang imong kamot sa atbang sa lamesa, ug moingon, “Panalanginan ka sa Dios, magpapanaw,” sa atbang n'yo lang.

. . . -cause He first loved . . .
And purchased my salvation
On Calvary's tree.


¹⁷⁰ Wala ba ninyo Siya ginahigugma bisan nga giadto na Niya kadtong kahoy para sa inyo, para lang ikanaug kamo gikan sa inyong kahoy? Dili ba ninyo Siya tugotan nga mopauli uban kaninyo niining buntaga? Pila man ang iuban Siya? Ipataas ang inyong kamot. [Nagaingon ang kongregasyon, “Amen.”—Ed.] Panalanginan kamo sa Dios.

¹⁷¹ Mga negosyante, gusto ko nga makigsulti kaninyo sa makadiyut lamang, sa dili pa mo mopauli.

¹⁷² Karon kung kamo dili pa Cristohanon, kung wala pa kamo nagkaaduna og pagpakig-fellowship; kamo nga mga Cristohanon, kamo nga mga tawo, kung gidawat ninyo si Cristo sa dihang nagpataas kamo sa inyong kamot, duola n'yo ang usa sa mga pastor nga ania dinhi, sultihi sila kung unsa ang inyong bag-ohay lang gibuhat. Dawaton kamo nila. Dunay usa ka tawo o usa ka pastor ang nagsulat bahin niining, usa ka bata dinhi,

niining itum nga igsoong lalaki. Tungod kadto sa grasya kagabii, nga kadtong batan-ong lalaki nagalingkod nga nagaobserbar lang didto ug gitoohan niya kadto. Kita n'yo? Nakita n'yo ba kadto? Kung giunsa niadtong batan-on, kung unsa nga milingi kaniya ang Espiritu. Gisugilon ni Billy sa ako ang bahin niadto, ug sa akong asawa ug kanila, human nga nakapauli na kami. Milingi Siya niadtong batan-on nga atua didto sa suok, milibot Siya ug hingkaplagan kadtong batan-on, kita n'yo, para ubanan siya sa Pagpauli. Labaw'ng kagamhanan! Ubanon ninyo Siya sa inyo. Lakaw mo'g magpakig-uban sa usa ka pundok sa kung asa man nga puedi kamo nga makapag-fellowship, nga ginawali ang tibuok nga Pulong sa Dios. Ug magpabilin uban nianang Pulong, bisan unsa pa ang mahitabo, kita n'yo. Husto kana.

¹⁷³ Mga Negosyante, kabalo ba mo kung unsa ang nahanabo kang Zaqueo? Nahimong miyembro siya sa Full Gospel Business Men sa Jerico. Husto kana. Kadtong sanga nga atua didto, miyembro na siya niadto. Daw sa mahinalion nga pahayag, pero tinuod kana. Sigurado ko kang Jesus nga dili Siya magtukod og unsa mang uban pa gawas ra sa usa ka sanga sa full Gospel, ug si Zaqueo nahimong kauban Niya. Busa karon, Zaqueo, ingon niana pud ang imong buhaton.

¹⁷⁴ Hangtud sa atong pagkitaay unyang gabii, panalanginan kamo sa Dios. Ibalik ko na ang panerbisyo dinhi ngadto sa pastor. 

KINSA BA SI JESUS? CEB64-0620B

(Who Is Jesus?)

Kining Mensahe ni Igsoong William Marrion Branham, una giwali sa Ingles niadtong Sabado sa buntag, Hunyo 20, 1964, para sa pamahaw sa Full Gospel Business Men's Fellowship International didto sa Holiday Inn sa Topeka, Kansas, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org